

ANTONII STÖRCK,


SAC. CÆS. REG. APOST. MAJESTATIS CONSILIARII AULICI,  
ARCHIATRI, NEC NON IN NOSOCOMIO CIVICO  
PAZMARIANO PHYSICI,

LIBELLUS,

QUO CONTINUANTUR

EXPERIMENTA,

ET OBSERVATIONES CIRCA NOVA SUA  
MEDICAMENTA.



---

VINDOBONÆ,


Typ. JOAN. THOMÆ DE TRATTNERN,  
CÆS. REG. AULÆ TYPOGR. ET BIBLIOPOL.

---


1765.

18809





# PRÆFATIO



*P*romiseram in prioribus meis libellis , me omnem daturum operam , ut nova ex plantis venenatis remedia detegerem.

\*

*Sunt*



## P R Æ F A T I O.

*Sunt propterea quidam ex viris  
litteratis , qui jam nunc simile quid  
expectant.*

*Verum id præstare bucusque non  
potui ; etenim frequentia & longa  
aulæ itinera me ab ægris meis mul-  
to tempore abesse jusserunt , impedi-  
veruntque me in observando ; simul  
etiam me diuturnus & violentus mor-  
bus detinuit , & vires adeo pro-  
stravit , ut per plures menses omne  
fere acrius studium debuerim ne-  
gligere.*



## P R Æ F A T I O.

*Binas quidem plantas venenatas ad tentamen medicum adhibui, eas in canibus probavi, & proprium meum corpus iis diversimode exercui ac divexavi, de earum tamen virtute & usu interno nil adhuc certi licet asserere.*

*Nilominus nullam ( quantum mihi erat possibile ) occasionem prætermisi, qua poteram experimenta facere, & novas de meis, jam propositis, medicamentis observationes colligere.*

*Has*

## P R Æ F A T I O.

*Has nunc in hocce opusculo recens-  
seo, & viris doctis consueta sinceritate  
communico.*

*Nec mihi timeo ; quamvis plures  
sint , qui in me & mea medica-  
menta sævere , & subinde sat ru-  
ditur invehuntur ; etenim hos pa-  
cata mente & sicco pede prætereo ;  
viris tantum iis scribo , qui artem  
amant & ejus incrementum , at-  
que recta corda habent , & ab in-  
vidia ( quod turpe vitium maxime  
inter medicos utinam exularet ) pe-  
nitus sunt immunes.*

P R Æ F A T I O.

*Lites ego nemini moveo , nec  
rostris nec unguibus mea medica-  
menta defendo , pacem amo ; sola  
ægotantium salus mihi cordi est ,  
uti & honesti viri officium.*

*Nec lucrum ex meis inventis  
peto , nec ullam gloriam ambio ;  
dum quid salutare inde ægris eve-  
nit , gaudeo , & mihi tacite gra-  
tutor.*

*Hoc totum est quod desidero , pre-  
cor , & exopto.*

Ob-



fideliter descriptis, constat, tuto posse præberi ægrotantibus, & salubrem in sanandis morbis effectum præstare.

Hæc sunt: *Cicuta*, *Aconitum*, *Colchicum*, *Hyosciamus*, *Stramonium*.

Quoscunque authores rei medicæ pervolvimus, invenimus ubique has plantas in venenatorum classe esse collocatas.

Constantes autem observationes nunc edocent, has debito modo præparatas, datasque ægris non solum non nocere, sed morbos, aliis remediis omnibus repugnantes, sæpe curare; hinc merito esse adscribendas in medicamentorum Classes.

Quo plura inveniuntur medicamenta, eo ars fit perfectior, faciliior, simplicior; nec medicus toties in morbis chronicis adeo curtam suam suppellectilem

lem cogetur fateri, nec tot peribunt ægri, nec fato suo toties relinquentur.

Multos enim morbos ideo dicimus incurabiles, quoniam ignoramus medicamenta, quæ ad eos debellandos valerent.

Omnipotens & adorandus mundi creator omnes hominum calamitates, morbosque prævidit; propterea tot mil-lenas procreavit plantas, quæ mortali-bus falubres essent.

Verum requiritur humana industria, requiritur sedula observatio, & experimentum sæpius summa cum cautela repetitum, ut detegatur, qua ratione hæ exhibeantur, quid agant, quove in morborum genere tuto conveniant.

Nec impossibile videtur, hoc evincere: tempore opus est, & unanimi ac

constanti bonorum medicorum labore atque studio.

Plantas innocuas determinare ad suas classes, adeo arduum non est; has enim in proprio tentare corpore impune licet; licet & eas dare ægris, unde earum effectus, & vis brevi patefcit.

Plus autem difficultatis, & periculi in plantis suspectis, & venenatis perscrutandis reperitur: Etenim has exhibere ægris nefas est, antequam certo constet, qua forma, & qua dosi sine omni prorsus detrimento dari possint.

Qui temerarie in hominis perniciem sua instituit experimenta, æque homicidii reus est, ac ille, qui gladio quem perstringit.

Hinc:



Hinc: ut prima tentamina in animali vili instituantur, jubet ratio, & proximi amor.

Ego semper mediocris staturæ canem selegi, & in principio parvam admodum dosim illi exhibui, eam augendo quotidie, quo usque eam canis sine noxa tulit.

Dum observavi magnas, & subitas in tali animali turbationes non fieri, imo illud a notabili fatis quantitate nequaquam affici, tunc minimam, & fere insensibilem portionem ipsemet assumsi, dosimque insensibiliter auxi, donec aliquem in me effectum animadverterim.

His prægressis absque omni conscientiae remorsu licuit mihi tuto in ægris similia remedia prudenti manu tentare.

Ex mutatione & effectu in me observato, poteram eminus concludere: in quonam morbo tale remedium foret bonum.

Incipiebam semper a parva dosi, eam augendo, donec debitus sequeretur effectus; quamprimum vidi cujusdam hominis idiosyncrasiam tale remedium non ferre, tunc illico abstinui; hac ratione nemini nocui.

Magna dein in omnia symptomata, & omnes mutationes adtentione, sedula & multiplici ac fida effectuum observatione, usus talis medicamenti se sponte extendit, & detegitur sensim, id in pluribus morbis tuto, & saluberrimo cum effectu posse exhiberi.

## CAPUT II.

**D**olendum est summopere, a multis adhuc pharmacopœis, & medicis varias promiscue herbas cicutæ vulgaris loco ad facienda experimenta applicari.

Exspectant inde effectum, quem ego cicutæ vulgari adtribuo, & merito falluntur.

Miserunt mihi ex variis regionibus diversas cicutæ species, quarum quælibet eodem modo, ac ego præscripsi, parata, longo tempore data est ægris veræ cicutæ loco; lamentabantur omnes, se paucas, aut plane nullas in morbis, ad quos curandos ego hanc plantam commendavi, mutationes observasse.



Nec mirabar: recto etenim instituto examine vidi, nullam fuisse veram cicutam.

Res ita contigit in *Anglia*, *Hollandia*, *Gallia*, *Italia*, *Berussia*, *Silesia*, *Bohemia*, & in ipsa *Austria* &c.

Inde factum est, ut multum meritæ laudis detraheretur cicutæ.

Hinc ortæ sunt lites, & in utramque partem pugnabatur. Quidam omnem prorsus efficaciam cicutæ denegarunt, quidam hæserunt dubii, alii diverso climati hæc adscribebant, alii experimentis convicti, cicutam utilissimum esse remedium, contendebant.

Fuit hoc primum, & maximum vitium, quod progressum rei cicutarie magnopere impedivit.

Fit sæpissime, ut in eodem loco, ubi vera cicuta crescit, inveniantur aliæ herbæ, quæ huic primo aspectu videntur simillimæ & eædem.

Unde colliguntur sine discrimine, paratur inde succus, & extractum; & ex his, dum ægris præbentur, sequitur effectus paucus, tardus, quandoque nullus.

Has herbas ita inter se crescentes toties hac æstare in Hungaria observavi, dum valles & locorum vicinias perquisivi.

Ipse ego primo intuitu aliquoties hæsitavi.

Dum autem quis dubitat, veramne haberet cicutam: is eam in calidiori ponat loco, dum incipit flaccescere aut ficcari, & vera est cicuta, tunc ingra-

tum murium domesticorum foetorem spargit.

Vel quod adhuc facilius: conterantur digitis herbæ folia, & intra pauca minutes digitos eodem foetore affectos.

Fœtor talis, qualem mures domestici spargunt, character est essentialis veræ cicutæ, hunc facile quisque poterit detegere, is enim si deficit, vera planta non habetur, licet reliqui characteres Botanici minus peritis exacte convenire videantur.

Quo hic fœtor est fortior, eo major inest plantæ virtus.

Faciliorem methodum veram inveniendi cicutam, vix quispiam demonstrabit.

Dum de virtute, & efficacia hujus plantæ agitur, & fiunt experimenta, certus quilibet esse debet, se veram, & rite paratam exhibere cicutam.

Et



Et tunc : si recto modo , fida mente ,  
atque debitis cautelis sua experimenta insti-  
tuerit , firmæ erunt ejus observationes , &  
inde fluent utiles , ac salubres conclusiones .

Quæritur nunc , qua forma dari de-  
beat cicuta ?

Quamvis proposuerim in principio so-  
lum extractum , inde rite paratum , vidi  
tamen novis experimentis totam plantam  
absque ulla fere præparatione dari tuto  
posse .

Qui extractum sumere renuunt , iis  
quandoque infusum , vel & decoctum  
prodest .

Ex herba recenti paratur conserva ,  
qua integra plantæ vis conservatur .

℞. Herbæ recentis & succulentæ cicutæ

lib. β

sacch. alb. in pulverem triti. lib. j.

mi-

misceantur & contundantur probe in mortario marmoreo, ut fiat conserva.

Conficitur quoque syrupus.

℞. succi cicutæ recenter expressi lib. j. β  
sacch. alb. lib. ij.

m. & coquantur vase figulino lento igne ad fyrupi consistentiam.

Folia in pulverem contrita exhibui quoque optimo cum effectu, & sine omni noxa.

Destillatur inde aqua fragrantissima, quæ in curandis pessimis ulceribus, quandoque plus efficit, quam decoctum, vel infusum, vel & alia quæcunque medicamenta; hoc celeberrimus noster chirurgiæ professor *Leber* primus tentavit, & pluribus confirmavit experimentis.

Paratur & oleum, quo partes affectæ illiniuntur & perfricantur.

℞. Herbæ recentis cicutæ conquassatæ,  
ol. olivar. aa lib. j.

m. & lento igne coquantur invicem ad humididatis consumtionem, dein exprimatur oleum.

---

### C A P U T III.

---

#### C A S U S P R I M U S.

**N**obilis matrona scirrhum, ovo galinaceo paulo majorem, longo tempore in mamma habuit; indolens is erat in principio; dein vero in eo tanti dolores pungentes advertebantur, ut ægra merito inde cancrum metueret.

Causa hujus mali nota non erat.  
Ægra præterea cachectica fuit, flaccida,  
&



& carebat appetitu ; & mentis hilaritas erat penitus prostrata.

Jussi pilulas ex solo cicutæ extracto paratas assumeret.

Harum usu mox rediit appetitus, mens fiebat hilarior, & intra paucos menses tumor totus disparuit.

Matrona hæc jam ultra annum optima fruitur sanitate, & ridet atque contemnit eos, qui harum pilularum usum adeo deleterium ipsi descripserunt.

### *CASUS SECUNDUS.*

**F**œmina rustica cancro foedissimo afficiebatur, qui ex radice nasi usque ad alam nasi sinistram, & infra oculi ejusdem lateris totam palpebram sese extendit, ossa nasi arrosit, & formavit labia in-

inæqualia , callosa , tumidis venis variegata , & dolentia admodum.

Malum adeo turpe erat visu , & adeo horrendum spargebat foetorem , ut hanc miseram jam vicini fugerent , & nemo cum ea amplius mensæ affidere vellet.

Incaustum adhibita sunt multa remedia.

Deserta ab omnibus me accessit.

Præscripsi ei cicutæ pilulas , & jussi , ut mane ac vesperi partem affectam saturato cicutæ decocto bene ablueret , & foveret aliquo tempore , dein applicaret cicutæ emplastrum.

His spatio trium mensium integre convaleuit , licet aëris injurias , & hyemale frigus ob summam pauperiem evitare non potuerit ; & tempore curationis duro labore sibi panem lucrari erat coacta.

*CASUS TERTIUS.*

**I**nfans, binorum & dimidii annorum, ante octo menses morbo varioloso ægre decubuit.

Hoc tandem superato cœperunt pedum articuli tumere, rubere, vehementer dolere, ita ut omnis motus fuisset impossibilis.

Postea ipsa ossa afficiebantur, prodibant exostoses, & oriebantur fœdissima ulcera, qualia sæpissime in spina ventosa observare licet.

Purgantibus remediis, & aliis, ut ajunt, sanguinem purificantibus, medici hoc malum tollere conabantur; verum infans emaciabatur, accessit cachexia, & ulcera nequaquam sunt emendata, nec minus est tumor.

Tan-



Tandem mater multo fletu meum exoravit consilium.

Per diem fovi fomentis, ex cicuta paratis, partes affectas, noctu apposui cicutæ emplastrum, & pro interno remedio dedi mixturam.

℞. Extract. cicut. dr. β

syrup. mannat. unc. ij.

aq. flor. samb. unc. vj.

M.

S. sumat omni trihorio cochleare unum.

Dum hanc dosim infans optime ferebat, addidi dein mixturæ integram extracti cicutæ drachmam, & jussi, ut omni bihorio daretur cochleare unum.

Intra sex menses solis his remediis disparuit tumor, subsederunt exostoses, separata sunt ossium cariosa fragmenta,

B

ul-

ulcera coaluerunt, rediit naturalis faciei color, vires factæ sunt bonæ; jam moventur omnes articuli, & sanus est infans.

### CASUS QUARTUS.

**F**œmina lotrix per plures menses gessit mammam admodum duram; hæc dein cœpit rubere, inflatæ sunt venæ, & orta sunt quinque ulcera profunda, quæ labia habebant dura, inæqualia, dolentia, ichor præterea foetidus copiose effluxit.

Emplastris variis, & variis medicamentis usa est hæc ægra, dolores autem inde sunt exacerbati, & ulcera in pejus ibant.

Meo consilio assumpsit cicutæ pilulas, deligavit ulcera cicutæ fomento, & desuper applicuit cicutæ emplastrum.

Ma-

Malum hac ratione sensim emendatum est, abiit omnis durities, ulcera cicatrice sunt obducta, & octavo mense mamma fuit in statu naturali.

Aliquoties datum est huic ægræ purgans tempore curationis.

### CASUS QUINTUS.

**H**omo, triginta aliquot annorum, foetidissima in ore & faucibus ulcera habuit, hæc serpebant in latum, ac profundum, velum pendulum inde erat pluribus in locis perforatum.

Decocta varia, varia gargarismata, & ipsa remedia mercurialia sunt adhibita absque eo, ut levamen sentiret æger.

His visis suasi, biberet ter quotidie vasculum saturati infusi cicutæ, & eodem infuso, addita pauca mellis rosarum



quantitate , fauces & os collueret omni trihorio.

Mox liberius deglutivit , vox , quæ antea erat refracta , & difficilis , clarior & distincta evasit , sensim ulcera munda- ta coierunt , & quatuor septimanarum spatio æger convaluit.

Semel tantum assumpsit purgans ex unciis quinque aquæ laxativæ dispensa- torii viennensis.

### *CASUS SEXTUS.*

**A**ncilla , 27. annorum , aphthis pessimis per totum os , & in ipsa lingua & faucibus laboravit.

Interna , & externa remedia , alias in similibus casibus summe efficacia , licet larga dosi , & multo tempore daren- tur , nil mutabant.

Unde

Unde jussi, ut ulcuscula omnia ter quotidie oblinirentur melle rosarum, in cujus uncia solvebatur extracti cicutæ drachma una & dimidia.

Ardor inde magnus excitabatur, sed brevi auferebatur ex ulcusculis omne lardaceum, loca facta sunt pura, & intra paucos dies perfecta aderat ubique cicatrix.

Pro remedio interno bis purgans antiphlogisticum assumsit ægra.

### CASUS SEPTIMUS.

**A**ncilla, 23 annorum, a binis annis habuit in utroque colli latere, sub axillis, & in mamma utraque tumores duros admodum, & diversæ magnitudinis.

Hos in principio neglexit, dein autem cum mole augerentur, & dolorem excitarent, varia quæfivit auxilia.

Verum inde non tantum tumores non sunt dissipati, sed quidam ex iis rupti sunt, & foedum fundebant ichorem, & tuberosa, sublivida, retorridaque labia efformabant, & ægra citra summum dolorem vix movere brachium poterat.

Incidit postea in pessimam cachexiam, retinebantur menses, languebat appetitus, immorigera erat alvus, tumebant pedes, cor sæpius palpitabat, facies erat lurida, & flaccida.

Hoc in casu præscripsi pilulas sequentes.



R. Extract. cicut. dr. vij.

mass. pil. ruff. dr. i.

m. f. pil. gr. iv.

S. fumat ter de die pilulas tres, & superbibat qualibet vice vasculum infusi herbæ ruthæ.

Hac sola methodo alvus lente solvatur, rediit mox appetitus, & binarum septimanarum spatio faciei color fiebat naturalis, minuebatur pedum tumor, auctæ sunt vires, tumores scirrhosi in principio facti sunt mobiles, dein mole minores, ulcera dabant pus bonum, & eorum labia detumuerunt, & evanuit dolor.

Et antequam quartus finiretur mensis, comparuit debito modo fluxus menstruus, functiones erant omnes bonæ, vix ullum aderat tumoris vestigium, &

fic brevi tempore finita fuit curatio , & restituta est integra fanitas.

### *CASUS OCTAVUS.*

**V**ir , annorum 43 , a longo tempore languit , vexabatur dolore dilaceranti in omnibus corporis articulis ; facies præterea flaccida erat , & terrei coloris , colli finistrum latus occupavit tumor durus instar ovi anserini , & capitis pars capillata obsidebatur plurimis tuberculis duris , quæ exulcerata flavum , & acre ac erodens ferum plorabant.

Decocta varia longo tempore assumpta , data varia purgantia , mixta mercurio ; adhibita remedia antiscorbutica nil proderant ægro , nec externa remedia adferebant levamen.

Cum

Cum meæ curæ se committeret, suasi solum cicutæ extractum, & decoctum ex radice bardanæ paratum; dedique omni decimo quarto die purgans e granis viginti massæ pilularum ruffi.

Hac methodo abierunt tumores, clausa sunt usculuscula, membra liberabantur ab omni dolore, restauratæ sunt vires, & intra binos & dimidium menses aderat optata sanitas.

### CASUS NONUS.

**H**omo, 32 annorum, a pluribus annis sensit visum suum debilitari, demum nec objecta, nec colores amplius distinguere potuit, pupilla utraque erat multum dilatata, cæteroquin in oculis nullum vitium detegebatur.



Remedia solventia, alvum ducentia, pediluvia, vesicantia &c. mali progressum impedire non potuerunt.

Suasi igitur, cicutæ extractum sumeret.

Per tres septimanas nullum sensit effectum; postea vero lancinantes in oculis dolores percepit, & frequentes scintillæ versabantur ante oculos, deinde potuit objecta per vices magis dignoscere, paulo post autem visus erat, ut ante turbatus, & debilis valde.

In quinta septimana jam omnia erant meliora; nec adeo frequentes advertebantur in oculis lancinationes, & pupillæ videbantur longe mobiliores, & erant magis contractæ.

Spatio quinque mensium solo hujus remedii usu continuato visus integre

re-

rediit, & pupillæ erant in statu naturali.

### CASUS DECIMUS.

**A**lii ægro eodem prorsus morbo laboranti, cujus autem oculorum bulbi erant difformes, protuberantes, & acuminati, idem cicutæ extractum longo tempore fuit exhibitum, sed nulla fiebat in melius, nec in pejus mutatio.

### CASUS UNDECIMUS.

**J**uvenis, 12. annorum, in oculo sinistro habebat pupillam admodum dilatatam, intra quam hærebat corpus ex flavo cæruleum, subpellucidum, rotundum, & visus eo in oculo erat penitus extinctus.

Tentavi quid cicuta hoc in casu præstaret.

Per tres fere septimanas nulla fiebat mutatio; postea vero æger sensit media hora post assumtum remedium magnam in oculo pulsationem, & vehementem dolorem, contrahebatur illud corpus heterogeneum ita, ut per pupillam protuberaret.

Duravit hoc per plura minuta, deinceps iterum omnia pacata, sed manebat malum immutatum.

Idem motus in oculo convulsivus rediit quotidie eodem modo per binos menses, & cum malum non emendaretur, abstinui ab hoc remedio.

Juvenis antea cachecticus, & macilentus, fiebat robustus, & recuperavit optimum



mum colorem, ratione visus autem lucrabatur nihil.

### CASUS DUODECIMUS.

**P**uer, 10 annorum, in manu & pede sinistro spina ventosa laboravit.

In pede jam aderat foedum ulcus, in manu autem tumor sublividus, & admodum dolens erat adhuc clausus.

Applicui externe emplastrum de cicuta, interne exhibui cicutæ extractum.

Longo tempore mutabatur nihil.

Tandem tumor in manu minuebatur, & ulcus pedis pus bonum fundebat, & minima ossis fragmenta separata sunt.

Continuavi eodem remedio, augendo dosim, ut sensim per diem grana  
qua-

quadraginta assumferit de cicutæ extracto.

Hoc modo intra quindecim menses disparuit in manu tumor, & ulcus pedis clausum est firmiter, & omnia redierunt in statum naturalem.

Aliquoties purgatus est æger, cæteroquin nullum medicamentum ei exhibitum fuit; videtur constans & pertinax remedii usus rebelle hoc malum superasse.

### *CASUS DECIMUS TERTIUS.*

**I**nfans, 3 annorum, rachiticus in omnibus extremorum articulis, vix pedibus poterat insistere, languebat multum, & erat valde morosus.

Cum in hoc tentata essent incassum omnia usitata contra rachitidem remedia,

dia, fuasi daretur ei de cicutæ extracto mane & vesperi granum unum.

Spatio paucorum dierum habebat majorem appetitum, & videbatur hilarior.

Auxi remedii dosim & dedi mane grana duo, & totidem vesperi, post tres septimanas ambulabat liberius, & jam pedibus infistebat satis firmiter, imo tumores articulorum videbantur minores.

Dedi dein quatuor extracti grana matutino tempore, & quatuor vesperi; hac dosi spatio dimidii anni malum sublatum est integre, & puer jam ultra sesqui annum bene valet, hilaris est & agilis, & bona gaudet memoria, quæ antea fuit valde debilis.



*CASUS DECIMUS QUARTUS.*

**V**ir , 30 aliquot annorum , continua tussi & lenta febre totus fere emaciatus , me venit consulturus.

Sputa foetida , tenacia , ex flavo fusca rejecit , collum totum scirrhoris glandulis plenum habebat.

Remedia jam fere innumera omnis generis ei data sunt ; malum tamen fiebat longe pejus , & noctes inquietæ ; sudor viscosus , foetidus , vires consumsit.

Dubitavi , num non & in pulmone similes scirrhoræ concretiones hæerent , quæ morbi hujus pessimi causa essent.

Exhibui propterea ter quotidie grana novem de cicutæ extracto , & jussi , ut desuper biberet vasculum infusi her-

bæ

bæ veronicæ, noctu dabam grana sex  
massæ pilularum de styrace.

Secundo statim die sputa procedebant liberius, & cœpit æger sentire ad cibos appetitum.

Mensis spatium jam vires habuit multo meliores, noctes erant sine paregorico tranquillæ, cessavit sudor nocturnus, & glandulæ colli fundebantur.

Vix elapsus est tertius mensis, quo hoc remedio utebatur, & jam bonam habebat sanitatem, vires integras, & labores suos (erat enim futor) sine ulla molestia & defatigatione potuit peragere.

### CASUS DECIMUS QUINTUS.

**F**œmina, 28 annorum, ulcere pessimo & carie ad tibiam pedis dextri laboravit.

C

Chi-

Chirurgi & medici in hoc curando allaborarunt diu ; verum incassum erant omnia.

Dum ad me venit, ulcus fuit admodum profundum, habens labia livida, inæqualia, ad minimum adtactum fundentia sanguinem, & os præterea cariosum, scabrum, nigrum ; dedi purgans ex granis XL jalap. & granis XX falis polychresti.

Dein suasi cicutæ extractum, ulcus linteis carptis infuso cicutæ probe imbutis replevi, texique totum cicutæ emplastro.

Intra quatuordecim dies jam omnia erant in melius mutata, labia erant minora, pus, prius foetidum, jam videbatur magis coctum, & minuebatur offis nigredo, & ægra recuperavit vires.

Post



Post tres septimanas iterum idem purgans dedi, dein iisdem remediis jussi continuari.

In quinta septimana magnum ex tibia fragmentum osseum incipiebat secedere, & ulcus fiebat purum.

In sexta septimana separabatur frustum osseum, binos pollices longum & dimidium latum.

Dedi dein iterum purgans, & cum omnia optime succederent, in remediorum usu nil mutavi.

Secefferunt dein adhuc parva fragmenta, & tertio mense ulcus fuit integre curatum, & foemina se optime habuit.

### *CASUS DECIMUS SEXTUS.*

**V**ir, sexagenario major, dolore rheumatico per totum corpus vehementer

ter afficiebatur , & cum a multis assumptis remediis nihil juvaretur , dedi cicutæ extractum.

Sumfit mane & vesperi grana ix.

Hac ratione spatio duodecim dierum a morbo liberabatur , quo jam per plures menses laboravit.

### *CASUS DECIMUS SEPTIMUS.*

**F**œmina, 31. ann., tumorem in hypochondrio sinistro rotundum, durum, & mobilem a longo tempore gessit.

Quotiescunque menstruus fluxus imminebat , dolores ibi enormes sensit.

Balnea applicuit , & varia solventia ac discutientia remedia ; dolores autem inde potius aucti , quam imminuti sunt.

Suasi cicutæ extractum , & externe appofui cicutæ emplastrum.

Post

Post quatuordecim dies erumpebant menses citra omnem dolorem, & tumor videbatur minor, mollior.

Spatio binorum mensium tumor disparuit, & menses procedebant libere.

Gravida dein hæc fœmina fiebat, de nullo incommodo conquerebatur, & sana fuit.

### *CASUS DECIMUS OCTAVUS.*

**V**ir supra costis spuriis in latere dextro tumorem scirrhum, binos pugnos magnitudine superantem, habuit.

Causam & originem ignoravit; nulum sensit dolorem, sed profunde absque impedimento respirare non potuit.

In variis nosocomiis fuit, & applicata sunt interne & externe fortissima remedia solventia, tam mineralia, quam



vegetabilia, vix autem ullam advertit mutationem, nisi quod cutis inflammaretur, & doleret multum.

Jussi per diem apponeret cicutæ fomentum, per noctem autem emplastrum, & dedi pro interno remedio ter quotidie scrupulum unum extracti cicutæ.

Spatio binorum mensium malum penitus sublatum est, & sanitas erat bona.

### CASUS DECIMUS NONUS.

**H**omo, 23. annorum, bubonibus in utroque inguine, & gonorrhœa admodum inveterata laboravit.

Mercurialia, aliaque remedia nullam in hoc ægro videbantur habere efficaciam, quoniam ea assumfit larga dosi, & longo usu absque ullo levamine.

Præscripsi propterea pilulas sequentes.

R. Ex-

℞. Extract. cicutæ dr. iij. β

mass. pil. extract. cathol. dr. β

m. f. pil. gr. iij.

S. sumat æger ter quotidie tres pilulas,  
& superbibat qualibet vice vascula bina  
decocti radicis bardanæ.

Externe ad bubones applicatum est  
emplastrum de cicuta.

His intra octo septimanas disparue-  
runt bubones, sanata est gonorrhœa, &  
homo bene valet.

### CASUS VIGESIMUS.

**V**ir, 35. annorum, post febrem inter-  
mittentem, nimis cito suppressam,  
sensit ventrem inflari, tendi & dolere hy-  
pochondria; angebatur pectus, facies fie-  
bat flava, & corpus totum intumuit.

Tangendo percipiebantur ubique in ventre duri tumores, urina fluebat pauca, appetitus erat penitus deletus, & vires plurimum prostratæ, noctes infomnes, tussis sicca, frequens.

Tentata sunt solventissima remedia, data sunt diuretica, & alvum ducentia; verum omnia optato successu carebant.

Æger præterea ructus acidos conquerebatur.

Præscripsi pilulas sequentes.

℞. Extract. cicutæ.

saponis venet. ana dr. ij.

mass. pil. ruff. dr. j.

m. f. pil. gr. iij.

S. sumat æger ter quotidie quatuor.

Primis diebus indeangebatur, sed urina ilico cœpit liberius copiosiusque prodire.

Post



Post decem circiter dies advertit æger minus tendi hypochondria, & minus dolere, ventrem esse molliorem; noctes erant magis quietæ, respiratio facilior, appetitus major, & vix ulla a pastu molestia.

Unde eodem remedio continuatum fuit, spatio trium septimanarum totum corpus detumuit, ventris moles facta est minor, nec tumores amplius adeo erant duri, urina copiose fluxit, & alvus quotidie bis aut ter solvebatur sine virium imminutione.

In curandi methodo nil mutatum fuit, & contigit, ut fere præter omnem spem hicce æger intra decem septimanas vires & integram sanitatem recuperaverit.

*CASUS VIGESIMUS PRIMUS.*

**V**etula septuagenaria verrucam magnam habuit in carpo manus dextræ, hæc subito elevabatur in tumorem nucis avellanæ magnitudine, qui in principio lividus erat, dein niger, tandem totum manus dorsum livebat, & ulcus fiebat foedissimum; foetor erat adeo enormis, ut adstantes eam omnes abhorrerent, eratque in ulcere tantus dolor, ut ægra nec dormire, nec comedere potuerit.

Fundus tumoris erat tenuis & mobilis; ideo filo ligabatur, & hac ratione separatus est. Sed ulcus mansit foedum, tendines erant nudi, sanies destillabat pessima, brachium totum doluit, vires languebant plurimum.

Applicata a chirurgis externa remedia

dia antiseptica , dataque similia interne a medicis profuerunt nihil.

Dum misera a me peteret consilium ; suasi bis quotidie manum per horam in calido cicutæ infuso teneret , & assumeret pilulas de cicutæ extracto , biberetque desuper infusum florum sambuci.

Balneum e cicuta paratum mira præstitit ; nam intra binos dies ulcus jam meliorem habebat colorem , foetor disparuit , tenue apparebat pus , dolor in brachio , & molestus in ulcere ardor defierunt penitus.

Rediit dein appetitus , noctes fiebant tranquillæ , increverunt vires , & spatio quatuordecim dierum ulcus totum erat sanatum , vetula bene habuit , & jam ultra octo menses sana vivit.



*CASUS VIGESIMUS SECUNDUS.*

**V**ir, 43 ann., ingentes in lumbis dolores patitur a pluribus annis, urina prodit fumma cum difficultate, habens semper sedimentum crassum, subfuscum, mucosum, tenax, foetidum, indurati sunt præterea ambo testiculi, & erant mediocri pugno majores, color faciei cachecticus, appetitus deletus, hypochondria tensa, venter inflatus, durus, nec sine remedio solvebatur alvus.

Multorum medicorum auxilium frustra imploravit, & magnam medicamentorum quantitatem deglutivit absque ullo effectū.

Neque

Neque quid levaminis adtulerunt balnea mineralia, neque aquæ minerales largiter potatæ.

Dedi pilulas sequentes :

℞. Extract. cicut. dr. iij.

extract. rad. helen.

mass. pil. ruff. ana dr. i.

m. f. pil. gr. iij.

S. sumat ter de die tres pilulas, & bibat qualibet vice desuper infusum florum sambuci.

Ab his mox levamen sensit, prodiit liberius urina, rediit appetitus, venter minus tendebatur, emolliebantur testiculi, dolor lumborum minuebatur.

Continuando hæc remedia per integros binos menses æger penitus convaleuit, urina facta est naturalis, disparuit cachexia, testes debitam habebant mol-

mollitiem , figuram & magnitudinem , appetitus erat bonus , detumuit venter , nec ullo dolore , aut tensione vexabantur hypochondria , & vir ad munus suum , quod jam per longum tempus negligere debuit , iterum erat aptus.

### *CASUS VIGESIMUS TERTIUS.*

**F**œmina , triginta aliquot annorum , jam ultra binos annos fluore albo laboravit , materies erat acris , foetida , lenta , quandoque fusca penitus ; sensit simul ægra in uteri orificio frequentes dolores lancinantes , & ardorem continuum , totum corpus erat debile , flaccidum.

Cum citra ullum levamen optima assumsisset remedia ; præscripsi cicutæ extractum.

Hoc



Hoc assumfit per sex septimanas ,  
& abierunt omnes dolores , prodiens  
materies non amplius foetuit , nec acris  
erat , & fiebat albi coloris , tenuis ad-  
modum , & pauca.

Cum autem corpus totum debile vi-  
deretur , & hic fluxus adhuc a vasorum  
flacciditate penderet , dedi sequentes  
pilulas.

R. Extract. cicut.

corticis peruv. aa dr. ij.

m. f. pil. gr. iij.

S. sumat quater per diem tres pilulas ,  
& bibat desuper vasculum infusi ruthæ.

His sine interruptione per tres sep-  
timanas adhibitis corpus totum factum  
est vegetum , desiit uteri fluxus albus ,  
& comparuerunt menstrua pulchri co-  
loris , & debita copia.

Juss

Jussi adhuc per mensem mane fumeret quatuor pilulas, & quatuor vespere, hac ratione convaluit.

### *CASUS VIGESIMUS QUARTUS.*

**V**ir, 40 annorum, studiis deditus, dolore vehementissimo rheumatico afficiebatur in brachio dextro; adhibitis suffimigiis, & unguentis spirituosis dolor dissipabatur, sed æger dein sensit in toto brachio stuporem, articuli sensim fiebant rigidi; hinc brachii & digitorum motus omnis fere impossibilis; tandem manus & totum brachium extenuatum fuit.

Æger balneis fortissimis usus est, & magna remediorum copia, his tamen nequaquam malum emendatum fuit, nec æger suo officio poterat fungi, quum  
pluri-

plurimum debebat scribere; unde ad miseriam reductus inter reliquos pauperes meum petiit consilium.

Re bene examinata cogitavi materiem rheumaticam unguentis spirituosus, & suffimigiis esse introrsum pulsam, & induratum, & tali modo motum impedire, & debitam nutritionem; hinc cicutam posse plurimum prodesse.

Cum autem simul laborabat spasms hypochondriacis, & ructibus, & appetitu deleto & alvo immorigera, & forti melancholia, combinavi sequentes pilulas.

℞. Extract. cicut. dr. iij.

gum. ammon. dr. j.

Castor.

massæ pil. extract. cathol. aa. dr. β

Camphor. gr. xx.

m. f. pil. gr. iv.

D

S. fu-



S. fumat ter quotidie tres pilulas, & bibat desuper bina vascula ex decocto radicis althææ, bardanæ, & liquirit.

His dum per octo dies utebatur, jam sensit majorem in brachio-calorem, & digitos movebat paulo liberius, & alvus solvebatur quotidie.

Continuavit igitur iisdem magno cum gaudio ultra binos menses, de die in diem advertit malum emendari, tandem rediit omnis in brachio motus, integrum robur, calor naturalis, evanuit melancholia, & tandem homo integre sanus infinitas mihi gratias egit.

### *CASUS VIGESIMUS QUINTUS.*

**F**œmina, 30. annorum, ab octo septimanis omnia rejecit vomitu, quæ potus, aut cibi titulo assumfit.

Ce-

Celebres medici tentarunt omnia incassum.

Ego advocatus vesperi, ut miserri-  
mæ huic ægræ adhuc quidquam consule-  
rem, dedi sequentem mixturam.

℞. Extract. cicut. dr. β

fyrup. papav. alb. unc. j.

aq. meliss. unc. iv.

laud. liquid. gtt. x.

M.

S. fumat omni hora cochleare unum.

Vix bina cochlearia ex hac mixtura  
assumfit, & jam melius se habere ajebat,  
& sistebatur vomitus.

Altero die tantum omni bihorio sum-  
fit cochleare unum, hac dosi continuaba-  
tur per plures dies.

Et jam sex sunt septimanæ, quibus  
ægra nec potum, nec cibos vomitu re-  
jecit.

D 2

Pare-

Paregoricis curatio adscribi non potest, cum hæc jam antehac magna dosi, & multo tempore fuerint eidem ægræ exhibita.

Soli igitur cicutæ debetur.

### *CASUS VIGESIMUS SEXTUS.*

**F**œmina, 30. aliquot annorum, jam in sextum annum habebat in mamma dextra tumorem ovo gallinaceo majorem, durum admodum, sed mobilem, dum instabant menses, dolore magno semper vexabatur.

Per quatuor annos nihil adhibuit, tandem suafu cujusdam vetulæ adplicuit emplastrum nigrum.

Mamma inde brevi indurata est, dolores facti sunt fere continui, unde ægra nec dormire potuit, nec comedere, & fuit emaciata.



A variis varia applicata sunt, sed malum augebatur fere quotidie.

Dum me accessit, mamma erat æque magna ac caput infantis, tota dura, ubique accreta, purpurea, hinc inde livida, venæ omnes varicosæ; dolores continuo urentes, rodentes, & lancinantes, reddebant noctes inquietas, & infomnes, atque totas vires destruebant.

Vidi casum arduum, nec multam curationis spem in animo fovi.

Pilulas assumere non potuit ægra, sua: si propterea, ter quotidie uncias quatuor saturati infusi cicutæ fumeret.

Dolores inde intra paucos dies mitigabantur, & rediit appetitus, cæteroquin autem spatio quinque septimanarum in mamma prorsus nihil mutatum fuit.

Dedi tunc purgans ex unc. iv. aquæ laxat. disp. vien.; dein præter cicutæ infusum exhibui mixturam sequentem.

℞. Extract. cicut. dr. ij.

syrup. 5 rad. aperient. unc. j. β.

aq. flor. samb. unc. vj.

liq. anod. min. gtt. xx.

M.

S. sumat omni bihorio cochleare unum.

Ufu hujus mixturæ spatio octidui omnes fere dolores filuerunt, ægra appetiit, dormivit tranquille, & vires increverunt.

Intra tres septimanas color purpureus evanuit, & lividus transibat in læte rubrum, detumuerunt venæ, mamma hinc inde mollior facta est, & exstillavit per papillam pus tenue paucò sanguine mistum.

Ap-

Appofui dein externe emplaſtrum cicutæ, juffique, ut omni bihorio fumeret duo cochlearia ex mixtura, & diligenter infuſum cicutæ biberet deſuper.

His ſenſim magna mammæ pars emol-  
liebatur, manifeſta aderat fluctuatio, dein  
cutis in acumen elevata rumpebatur, &  
effluxit copioſum ſubcruentum pus, hac  
ratione plus quam tertia duræ molis pars  
ſeceſſit.

Intra biduum ſponte claudebatur cutis  
apertura, & reliquum, quod ſupererat,  
erat adhuc valde durum, nullus tamen  
dolor obſervabatur, unde vires poterant  
ſomno, & cibis refici.

Eorundem remediorum uſus fuit ſe-  
dulo continuatus, & ſenſim iterum magna  
pars ſuppuratione conſumpta fuit.



Sic spatio quinque mensium omne durum suppurando auferebatur, mamma est naturalis, & foemina sana.

### *CASUS VIGESIMUS SEPTIMUS.*

**F**oemina, 28. annorum, ultra annum habuit mammam dextram totam scirrhusam, & dolentem admodum, omnes ei cancrum præsagiebant.

Applicatis emplastris dolores augebantur & duries.

Dum me accessit, exhibui statim cicutaë extractum magna dosi, externe applicui emplastrum de cicuta.

Intra octiduum mamma jam erat undique mollior, dein diffiliit in innumera parva, rotunda, tubercula, dolor omnis desiit; foemina antehac cachectica, & debilis, recuperavit suas vires, appetitum

titum, somnum, & naturalem faciei colorem.

Nondum sunt bini menses, quibus ægra utitur cicutæ extracto, & nec sexta amplius scirrhi pars superest, & hoc quod remanet, mobile est.

*CASUS VIGESIMUS OCTAVUS.*

**P**uer, 12 annorum, a quatuor annis glandulas omnes submaxillares partis dextræ usque post aures habuit duras, scirrhosas, & in enormem molem elatas.

Utebatur hic cicuta per integros novem menses, nec notabilem in tumoribus effectum sensit, nisi quod quædam loca fierent paulo molliora & mobilia, vires autem, quæ antea erant prostratæ, insurgabant ex cicutæ usu, & sanata est

totius corporis cachexia; & ideo mater coegit puerum, ut extractum diligenter continuaret, sperans, quod sensim tumores funderentur.

Verum nulla in his fiebat mutatio, licet ultra drachmam quotidie de hoc extracto assumferit.

Tentavi tunc, quid fieret, dum hi tumores remedio externo paulisper irritarentur, & ideo admiscui unciae uni emplastri de cicuta drachmam unam emplastri vesicatorii; partes tumidae inde rubebant, dolebant aliquantulum, elevabantur parvae, & prurientes pustulae, per quas acre liquidum transfudavit.

Continuatum praeterea fuit usu cicutae extracti; unde factum erat, ut nunc spatio trium mensium, ingens tumorum moles eo fuerit redacta, ut jam

vix



vix dimidium gallinæ ovum adæquaret.

Emplastrum autem mixtum cum vesicatorio tantum per octiduum apponebatur, id enim puer diutius ferre non voluit, cum nimium ardorem excitaret.

### *CASUS VIGESIMUS NONUS.*

**V**irgo, 23 annorum, strumam in glandula thyroidea a binis annis sat magnam gessit; hæc increvit sensim, & partes interiores compressit, produxitque capitis dolores, & sibilosam respirationem.

Postquam multa medicamenta incassum applicuisset, meum petiit consilium.

Suasi extractum cicutæ, dedi ilico quadraginta grana per diem, & hac dosi spatio paucarum septimanarum defuit

fiit capitis dolor, respiratio libera facta est, & evanuit struma.

In aliquibus similibus casibus frustra dedi cicutam, licet eam ægri larga dosi, & longo tempore devoraverint.

### *CASUS TRIGESIMUS.*

**F**œmina ulcus foedissimum latum & cancrosum habet in manu dextra. Chirurghi & medici innumera fere remedia applicuerunt sine omni effectu bono, morbus enim semper magis exacerbatus fuit.

Huic dedi statim grana XL extracti cicutæ per diem, externe partem affectam saturato cicutæ decocto jussi continuo foveri, & noctu tegi emplastro de cicuta.

Sic intra breve tempus magna corruptæ carnis frustra exciderunt, ulcus purum factum est, apparuit pus bonum & sensim inducta fuit cicatrix.

Modo tantum margines adhuc callosi supersunt, qui autem quoque minuuntur.

### *CASUS TRIGESIMUS PRIMUS.*

**B**ini pueri, ex eadem matre nati, jam fere a nativitate turpissima tinea capitis, & foedissima, squammosa, foetente scabie per totum corpus laborant.

Multi medici, postquam fortia, & efficacia alias remedia tentassent sine mali emendatione, hos miseros fato reliquerunt, & dimiserunt, quasi curari non possent.

Dum



Dum mater eos mihi adduxisset, dedi statim cicutæ extractum, & suasi, ut totum corpus, & caput quotidie bis lavaretur saturato cicutæ decocto.

Hæc adhibentur in quintam septimanam, & malum jam multum minuitur, loca plurima pura sunt, & nitida, abest foetor, & pueri longe meliori sanitate fruuntur, & sunt alacres, & adest spes optima perfectæ curationis.

---

## C A P U T IV.

---

### C O R O L L A R I A.

**T**uto datur cicuta usu interno.

Multi adhuc sunt, qui venenum hujus herbæ timent, & ejus usum religiose evitant.

Inter

Inter plebejos homines, inter mulierculas, imo & inter nobiliores dari tales minime miror; medicos autem adeo inanes, & præjudiciis adeo temulentos inveniri posse, nunquam credidifsem; verum id in epistolis ad me datis lego, id ex aliis audio, id dum vocor ad consilia, experior.

Pessimum præterea hi medici morem habent, quod non tantum suis ægris, quibus prodesse posset, hoc remedium non exhibeant, sed quod etiam conentur aliorum ægrorum, qui bona fide agunt, animos ita turbare, ut vel magno metu id assumant, vel usum penitus respuant.

Dolui hac æstate medicum, qui sibi ipsi ex ignaro metu usum vel tantum exter-  
num

num denegavit, dum multum inde effectum sperare licuisset.

Is ani fistula jam a longo tempore laborat, & est ea adeo profunda, & in multos divisa sinus, ut periti chirurgi habitis consiliis operationem instituere ausi non sint.

Et ideo varia tentata sunt remedia, quæ autem nullo modo malum emendaverunt.

Chirurgus, in re cicutaria multum versatus, tandem injectiones ex herba cicutæ paratas suavit, meum quoque consilium petebatur, & suavit idem.

Re hac audita fremuit æger, & respondit: se velle potius malum suum adhuc ferre; imo se velle perire potius, quam tale quid vel usu externo tentare in suo corpore: etenim ajebat se multos  
per-



pervolvisse authores medicos, qui omnes hanc plantam descripserunt venenatam, imo se id a suis Professoribus in publicis collegiis confirmatum audivisse.

Nulla juvabat ratio, nullum valebat experimentum.

Bonus hicce homo multos sibi similes collegas habet; quidam ex mero præjudicio adeo meticulosi sunt, alii vero ex ignara arrogantia, omnia quæ nova videntur, contemnunt, putantes: se omnes artis fontes ita exhausisse, ut nil amplius superesset.

Si tenelli infantes cicutam innocue assumunt, an quis sanæ mentis credet, eam nocere posse adultis?

Cuilibet quotidie exhibere possum infantes vegetos, robustos, & sanissi-

E

mos,

mos , quorum matres in utero gerentes magnam cicutaë quantitatem devorarunt.

Nec mater inde quid mali passa est, nec infantes inde affecti videntur , cum optima sanitate gaudeant.

Si venenum inesset, certo simili in casu se præprimis manifestaret.

Sunt infantes , quibus ob diversa mala in primo , secundo , tertio , quartove suæ ætatis anno longo tempore exhibui cicutam & valent optime.

Si jam his quorum vitæ stamina adhuc tenera sunt, cicuta non nocet , cur noceret robustis & adultis ?

Si cicuta tuto dari non posset , deberet necessario vis ejus venenata , vel ilico ægro noxam adferre , vel deberet id fieri dum usus protrahitur , vel deberent peracta jam curatione sinistra obfer-

fervari sequelæ ; verum ex his nullum , tot jam factis experimentis , observatum fuit ; qui enim ante multos annos hoc remedio curati sunt , adhuc fani persistunt & optime valent.

Profecto ! qui humana ratione præditus est , is ad comprobendam cicutæ innocentiam fortiora , & plura argumenta desiderare non poterit.

Et qui jam verbis , & experimentis fidem negat , is veri medici nomen non meretur.

Vim solvendi inesse cicutæ , ex omnibus experimentis clare patet.

Ubique igitur obstructum referandum , ibi cicuta indicatur , & in veris obstructionibus certo certius debitum præstat effectum , & tumores ab obstructione natos fundit , dissipat.



Subinde scirrhi usu cicutæ insensibiliter liquefcunt instar glaciei, subinde diffiliunt in plura subrotunda tubercula vel in fibrosas oblongas moleculas, quæ minuuntur sensim, & disparent penitus.

Si inveteratus talis tumor est, tunc quandoque, dum agere incipit cicuta, dolor in eo advertitur; nec malum hoc est signum, partes enim compressæ, insensiles antea, & quasi emortuæ, vigorem tunc suum & vitam recuperant.

Nec durities, etiamsi fere lapidea sit, medicum terrere debet, vidi enim durissimos tales tumores, & instar cartilaginis, vel ossis resonantes, quandoquæ cito, & facile usu cicutæ fuisse consumptos.

Dum autem similes tumores sunt compositi, & partim ex obstructione, partim ex callosa concretione nati, tunc curatio est

est longe difficilior, & haud raro impossibilis, licet durities adeo fortis non sit.

Ope cicutæ solvitur quidem materies in vasis stagnans, sicque pars mollescit, & mole minuitur, sub finem autem remanet flaccida, fibrosa, & quasi carnea substantia, quæ vix remedio cedit, & facilem renascendi tumoris occasionem præbet.

Post contusiones persæpe tales fiunt tumores.

In his tumoribus cicuta id boni præstat, quod minuat molem, & reddat partem affectam magis mobilem, ut, si necessitas exigat, operatio chirurgica tutius ac facilius possit institui.

Quandoque autem levem inflammationem excitat, quæ abiit in suppurationem, & hoc modo totum tumorem consumit.

Est quoque suppuratio salutaris cicutaë effectus, dum ægri vires huic ferendæ sufficientes habent.

Tumores fungosos, sarcomatosos, verrucosos cicuta raro solvit, eos tamen quandoque usu interno, ac externo suppurando destruit.

Hinc ejus usus semper acribus & causticis est præferendus.

Mirabar multum, dum mihi doctus cæteroquin medicus in epistola conquerebatur, quod cicuta diu & magna dosi exhibita nullum sensibilem effectum præstisset, in magno glandulæ thyroideæ tumore, qui subito oriebatur, dum æger grave pondus elevaret, idque extensis brachiis sustineret diu.

Natum hunc ab extensione tumorem, qua ratione solveret cicuta?

Qui



Qui remedii hujus virtutem novit, & mali originem, ac causam, & eas secundum artis regulas inter se confert, is certo jam a priori debet intelligere, simili in casu frustra fieri experimentum.

Alius hoc remedium diu adhibuit in magno arteriæ subclaviæ aneurysmate, & cum inde speratum eventum non vidisset, cicutam inane esse remedium judicavit.

Alius herniam inguinalem pro bubone habuit, ad quem solvendum cicutæ extractum ægrotanti præbebat; & cum post longum usum nullam videret mutationem, in consilium vocavit chirurgum, qui clare demonstravit, herniam adesse incarceratam, & ideo frustra tentari tale remedium.

An non in his casibus præter omnem rationem adhibetur cicuta? quibus dein placet cicutæ virtutibus detrahère; ii tot ægros numerant, quibus incassum dederunt cicutam.

Imperiti homines si tale quid faciant, parcendum est; si vero id a medico fiat, videtur esse indignum.

Tumores sacco inclusos quandoque in principio cicuta perfecte aufert; etiam majores subinde emollit, & fundit, cum autem remanet saccus non solubilis, facilis datur recidivæ locus, nisi sacci latera collabantur, & sibi invicem applanata concrecant.

Similes magnos tumores, cuti & partibus vicinis adhærentes firmiter, solvit plerumque cicuta a cohæsione, eos red-  
dit

dit mobiles , & aptos ad chirurgi sectionem.

Dantur ægri, quorum fere omnes corporis partes, & omnia fere viscera tumoribus occupantur, & cum horum numerus nimis magnus sit, solamen quidem a cicuta habere possunt, eos tamen integre curare fere est impossibile, & opus est longo tempore, & multa patientia.

Consideratis effectibus, quos cicuta in tumores edit, facile patet,

Quid sentiendum sit de cicutæ effectū in curandis cancris, cum haud raro cancer a prægresso tumore oriatur.

Plurimis experimentis constat: cicutam in virus cancrosum agere, fanem destruere, & ichoris loco bonum pus producere.



Cicuta igitur acre cancrosum corrigi-  
git, cicuta tumores solvit!

Ad canceri curationem nil aliud re-  
quiritur, quam, ut tumor, ex quo ori-  
tur cancer, fundatur, & acre cancro-  
sum destruat; hæc duo præstat cicu-  
ta, consolidatio folius dein naturæ opus  
est.

Dum autem canceri radicem destruere  
cicuta non potest, licet corrigat acre  
cancrosum, curatio erit impossibilis.

Manet enim loci vitium, quod tan-  
tam semper novæ saniei copiam rege-  
nerat, ut dein vis cicutæ non amplius  
ei subigendæ par sit.

Continua in tali loco irritatio sæpe  
nimium humorum affluxum procreat,  
ingens copia feri perpetuo exstillat,  
indoles liquidorum depravatur, sensim  
nu-

nutritio deficit , & tales ægri tabe pereunt.

In cancro occulto, si ope cicutæ dolor sedatur, si venæ varicosæ subsident, & pars affecta naturalem induit colorem, spes optima curationis tunc adest, præsertim si simul tumoris moles sensim liquecat.

Si cutis cancroso tumori non adhæret, vel si adhærens usu cicutæ brevi separatur, pro bono signo habetur.

Pejoris autem ominis est, si cutis crassa sit, & tumori pertinaciter concreta.

Si color cutis lividus, aut purpureus ubique in naturalem mutetur, bonum est.

Si in uno aut in pluribus locis maneat livor cutis, aut tensio purpurea,  
tunc

tunc ibi plerumque oritur titillatio, vel dolor urens, aut subinde lancinans, dein elewantur pustulæ prurientes, secedit epidermis, & pars excoriatur, & serum acre prodit; si dein bonum sequitur pus, spes est: tumorem posse suppuratione consumi; præsertim si ægri vires suas conservant.

Si autem ægri, dum pus se format, amittunt appetitum, si debilitantur febre vespertina, & sensim emaciantur, tunc bonum promittere eventum haud licet.

Etenim quamvis cicuta optime agat, & bona suppuratione totum cancrum destruat, vires tunc ad vulnus consolidandum deficient, & sanguis a pure resorpto inquinatus lethalem tabem adfert.

His in ægris non est danda magna cicutæ dos, ne febris suppuratoria fiat

ni-



nimum vehemens, imo ejus usus quandoque est interrumpendus, donec febris fileat, & convenienti diæta, & debitis remediis vires fuerint refocillatæ.

Lenta tali, & prudenti, ac rationali methodo sæpe conservantur ægri, & subinde curantur, qui violentiori modo (nimum properando) periissent.

Si in ulcere, puris loco, lardacea, subflava, crusta oriatur, & serum acre continuo depluat, malum est; præsertim si superveniat tussis.

Si ulceris color læte rubet, & durities sensim mollescit, & minuitur; si nulla, aut exigua adsit febris, si sit pus bonum, & nullus advertatur foetor, si circa labiorum margines albicans cuticula cicatricis indicia monstret, sperare & fere promittere licet certam curationem.

Si

Si ulceris labia callosa, & crassa sint, vel fungosa, & externis remediis non minuantur, aut si cultro ablata cito iterum recrefcant, malum est.

Nam licet totum scirrhum, cancrosumque sit consumptum, labia illa sanationi resistunt, impediunt consolidationem, & malum reddunt curatu impossibile.

Si autem hæc labia simul liquefcant, aut cultro rescissa non regenerentur, tunc malum integre cedit.

Quandoque cancer occultus, aut apertus usu cicutæ in gangrænam convertitur.

Hæc mutatio fere semper salubris est, & celerem sanationem promittit; & si id ægri vires, & morbi symptomata admittant, tunc cicutæ usus non de-

debet ilico interrumpi, dum gangræna observatur, is enim est protrahendus, donec vel integra moles, vel maxima ejus pars sit gangrænosa.

Inducta tunc gangræna seponitur cicuta, & interne, externeque adhibetur cortex peruvianus, ut sanguis contra gangrænosam labem præmuniatur, & pars gangrænosa cito separetur, & ægrotantis vires restaurentur.

Quo facto dein curatio solo cicutæ usu interno, ac externo plerumque absolvitur.

Cancer quandoque facile tollitur usu cicutæ, si ea debito tempore applicetur.

Si autem malum negligatur diu, & partes internæ jam arrosæ sint, & humores omnes pessima cancrofa indole affecti, tunc levamen quidem adfert,

&



& malum emendat, non tamen id penitus sanat.

Cancris acrimonia videtur in diversis subjectis diversam habere indolem, cum hanc quandoque idem remedium cito, & facile destruat, quandoque autem parum aut nihil mutet.

Gravitas rei meretur sane, ut Professores clinici omni possibili attentione hanc rem inquirerent, & fidis observationibus determinarent signa diagnostica, quibus cognosceretur diversitas, & vera acrimoniae indoles ac species.

Spina ventosa haud raro curatur opo cicutæ.

Si materies formans spinam ventosam in osse solum hæret, idque sine erosione in tumorem elevat, curatio quandoque facile succedit, & solo interno cicutæ usu,

&

& applicato externe fomento, aut balneo ex eadem herba, tumor subsidet, & dissipatur.

Si autem carnea & fungosa circum nascitur moles, tunc tardior fit cura, quandoque pars exulceratur, & excrescentia debet suppuratione consumi; quandoque illud fungosum remediis resistit penitus, & debet cultro rescindi, aut causticis deleri.

Si os ipsum carie affectum est, curatio perfici non potest, nisi fragmentis pareretur exitus; & si tumor emollitus sponte non aperiatur, tunc arte pertundendus est.

Hos ægros dein jubeo, ut partem affectam quotidie bis per horam foveant in saturato cicutæ balneo, interne extractum cicutæ exhibeo.

Hac methodo sola sæpius vidi cariosum separari, tumidum disparere, & firmam induci cicatricem.

Si tamen fragmenta nimis pertinaciter parti sanæ adhæreant, tunc instrumento perforante est separatio adjuvanda.

Fungosum ex ulcere propululans, si fomentis aut digestivis remediis non minuitur, & domatur, acriora sunt applicanda.

Huic scopo sæpius satisfaciunt sequentia remedia externe applicata.

℞. Extract. cicut. dr. j.  
mellis rosar. unc. j.  
spirit. sal. acidi gtt. xxx.

M.

vel ℞. Extract. cicut. dr. j.  
ung. ægyptiac. unc. β  
mell. rosar. unc. j. β

M.

vel



vel ℞. Extract. cicutæ dr. j.β  
aquæ phagadænicæ lib. j.

M.

Si hæc ægris dolorem excitant, tunc quædam opii grana admiscentur.

In his autem adhibendis prudentia, & artis peritia opus est; nocent enim dum quædam adest inflammatio, aut si malum hæreat in loco, ubi adsunt partes corporis admodum sensibiles, & pronæ ad irritationem, vel si & ipsi ægri habent systema nervorum nimium mobile.

Ulceræ inveterata & pessimæ indolis, & rebellia ad quodvis etiam efficacissimum medicamentum, cicutæ usu quandoque brevi sanantur.

Si hæc ulceræ ipsa ossa affecerunt, debet prius arte illud in osse destructum auferri, antequam cicatrix formetur; hoc

F 2

enim,

enim, si non fiat, brevi iterum in loco, qui sanatus videbatur, oritur dolor, redditque ulcus priori multo malignius.

Labiorum, gingivarum, buccarum, fauciumque serpentes, ac rodentes exulcerationes, quandoque nullo alio remedio curari possunt, nisi cicutæ usu.

Os colluitur saturato cicutæ decocto, cui paucum mel rosarum additur.

Vel partes exulceratæ melle rosarum, & cicutæ extracto aliquoties per diem illiniuntur, quod adhuc est efficacius.

Vidi profunda ulcera sic sanata; imò partes in velo pendulo exesæ recrecebant, & vox depravata reddebatur naturalis.

Angina venerea, ad reliqua remedia quandoque pertinax, gargarismati, ex  
sa.

faturato cicutæ decocto, melle rosarum, & pauco nitro parato, quandoque cedit facile, & cito.

Vidi maxillarum caries profundas sæpius perfecte curatas, dum tale remedium aliquoties per diem in ore ad partem affectam tenebatur; imo imponebantur, si erat possibile, in locum affectum lintea carpta, imbuta hoc remedio.

Sinus & fistulæ in ore profunde penetrantes, & fundentes foetidissimum ferum, aut faniem, facta injectione ex tali remedio sanantur sæpe.

Si tamen nimium callosa erant latera, plerumque cultro debebant perfcindi.

Dum quandoque huic remedio tinctura myrrhæ aut aloës jungebatur, fiebat offium separatio partiumque consolidatio celerior.



Si dentes in vicinia similium fistularum cariosi sunt, artis est plerumque, ut ii evellantur.

Ani fistulæ fatis profundæ, & jam inveteratæ sæpius sola injectione ex saturato cicutæ infuso, cui paucum mel rosarum additur, sanantur.

Callosum, quod adest, plerumque melle chelidonii, & cicutæ extracto consumitur. Subinde, ut hæc citius agant, levis fit harum callofarum partium scarificatio.

Fomento ex cicuta parato, vel melle rosarum, & cicutæ extracto persæpe tolluntur foedissimæ pudendarum muliebrium exulcerationes.

Scabies inveterata, lepræ species admodum foeda, tinea pertinacissima lotu ex  
cicu-

cicuta parato, & hujus remedii usu interno haud raro percurantur.

Hos autem ægros curationis tempore juvat multum, si omni decimo quarto die purgentur.

Dum lotione squammæ, & crustæ ablatae sunt, rubet quandoque cutis, fit tensa, & admodum sensibilis, & superficialis videtur adesse inflammatio.

Abstinendum tunc est a cicutæ usu, & conveniunt emollientia, & leniter nitrosa decocta, indicantur & tunc similia balnea; his additum lac prodest multum.

Tali modo debita restituitur cutis molities, rubor disparet, redeunt vires, & sanitas.

Si hinc inde novæ apparent pustulæ, aut crustæ, signum est, sanguinem nondum penitus a scabiosa labe esse immu-

nem, & ideo præter talia decocta necesse est adhuc per multum tempus exhibere cicutam, ut recidiva præcaveatur.

Dolores rheumatici, arthritici, podagrici quandoque solo interno cicutæ usu sopiuntur, & fugantur penitus.

Balneum autem simul adhibitum, aut fomentum, accelerat curationem.

Cataplasmata ex lacte, & cicutæ herba parata subinde momento citius dolores podagricos auferunt, solvunt podagricos tophos, dissipant materiem cretaceam.

Juvat quoque cicuta, ubi materies podagrica, arthritica, aut rheumatica retrogressa in variis corporis partibus varia symptomata, & morbos producit. Sic natum dolorem lateris chronicum, tussimque chronicam feliciter curavi. Hoc re-

me-



medio, ortam ab eadem causa, ischuriam sublatam vidi.

Membrorum, & articularum rigiditas, producta a materie rheumatica, vel arthritica, tollitur feliciter fomentis ex cicuta, & usu ejus interno.

Solo cicutæ extracto sæpius curavi diuturnos dolores rheumaticos, vel arthriticos, qui oriebantur post febres acutas exanthematicas, præsertim miliares, dum ægri adhuc debiles se nimis cito aëri frigido & humido exposuerunt.

Cutis excoriationes, pruritus, efflorescentiæ cutis superficiales solo cicutæ balneo, vel fomento, aut lotione tolluntur sæpe; sic quoque intolerabiles circa pudenda prurigines sanantur.

Fluor albus malignus, & inveterata gonorrhœa huic eidem remedio quando-

que facile cedunt, dum alia decantata remedia diu jam incassum adhibita sunt.

Hoc etiam remedio sæpius mucosarum hæmorrhoidum tumores dissipantur, & fluxus absque noxa sistitur; quod eo facilius fit, dum pars affecta fovetur cataplasmate ex lacte & cicuta parato.

Dum uteri vasa obstructa menstruum fluxum impediunt, & dolores inde oriuntur, cicuta juvat, & auget quoque fluxum, dum nimis parcus est. Systema uterinum liberum reddit, & aptum ad conceptionem.

Dum autem similes dolores a meris spasmis ortum habent, vix prodest cicuta.

Cicuta movet urinam, hinc quandoque ischuriam tollit, & levamen adfert in affectu calculoso, urinæ secretionem

pro-

promovet, dum eam vasa renalia obstructa impediunt.

Sic omnes totius corporis functiones secretionisque reddit liberas, & integras.

Epilepsiam quandoque sanat cicuta.

Lætor, quotiescunque video virum doctum & diligentissimum, quem hoc remedio a pessima epilepsia integre liberavi, qua jam a teneris annis affligebatur, & a nullo alio medicamento levamen percepit.

Plures jam sunt anni, quibus ab hoc malo immunis vivit, & valet.



## CAPUT V.

*De Aconito.*

**A**conitum flore cæruleo me ad experimenta adhibuisse, ex prioribus constat.

Nihilominus tamen novi, longe alias species hujus loco datas fuisse ægris.

Pharmacopœorum est talia medicamenta præparare; hinc & illi omni possibili cura deberent herbarum species seligere, & eam a reliquis separare, quæ vera est.

Nec hoc solummodo fœminis, aut famulis, qui herbas colligunt, commitendum est, ipse magister inquireat sollicite,

cite, an vera herba sit, quæ exigitur?  
& an huic non aliæ, haud multum ab-  
similes, intermisceantur? dein quoque,  
an præparatio debito modo fiat, ipse  
videat.

Non sufficit, ut nomen herbæ tan-  
tum sciat, sed necesse est, ut ex au-  
thoris scriptis veram herbæ speciem co-  
gnoscat; nomen enim apud varios Bo-  
tanicos, varium est.

Aconitum in montanis locis crescit,  
aut colitur in hortis.

Antequam flores prodeant, aptissi-  
mum est præparando extracto.

Magnum inde, & innocuum habetur  
medicamentum; quod sequenti forma  
plerumque præscribitur.

℞. Extracti aconiti gr. iv.  
sacchar. alb. unc. β

m.

m. exacte, ut fiat diu terendo in mortario vitreo pulvis tenuissimus.

### CASUS PRIMUS.

**N**obilis matrona, jam ultra anni spatium tophos in fronte, parte capillata capitis, in pedum tibiis, & ad digitorum articulationes habuit; pruriens præterea scabies totum corpus defœdavit.

Plurimam temporis partem in lecto tranfigere debuit, dolores somnum turbarent, diminuerunt vires, & aberat appetitus.

Hæc matrona in castris fuit, & diversa ibi applicabantur remedia, mercurius ad salivationem usque ei datus fuit.

Verum



Verum malum nequaquam minutum est, imo vires fiebant minores, dolor dilacerans omnia membra invasit ita, ut misera sæpe pedibus insistere non potuerit.

Hoc in statu Viennam advecta meum consilium imploravit.

Dedi in principio purgans ex unciis quatuor aquæ laxativæ dispensatorii Viennensis, dein bis de die exhibui scrupulum unum ex pulvere de aconiti extracto, & saccharo.

Post octiduum dedi ex hoc pulvere ter quotidie drachmam dimidiam.

Dolores post paucos dies minuebantur, topi fiebant molliores, & minores, increvit appetitus, & somnus nocturnus erat longe tranquillior.

Cum

Cum sic omnia mutarentur in melius, dosim medicamenti non augebam.

Scabies tamen mansit in eodem statu, hinc partes affectas bis quotidie decocto cicutæ cum lacte parato curavi lavari, & foveri.

Hac ratione spatio trium mensium cura felicissime perficiebatur.

Tophi disparuerunt penitus, evanuit scabies, nulli aderant amplius dolores, corpus totum erat pingue, & vires ita bonæ, ut hæc matrona per integras noctes iterum choreis publicis interesse potuerit, (erant enim tunc bachanalia).

Tempore curationis bis adhuc dedi purgans ex unciis quatuor aq. lax. disp. Vien.

In diæta iussi, evitaret pingua, nimium acida, & acria; omnia autem, quæ

quæ erant mollia , probe nutrientia , & facile digerenda , concessi , nec interdixi vinum , nec caffèæ usum moderatum.

### CASUS SECUNDUS.

**V**ir , 42 annorum , jam a pluribus annis circa tempus vernale , & autumnale corripiebatur violentissimis doloribus articulorum omnium ; præsertim autem dolor ad phalanges digitorum pedum , & manuum figebatur , tanta quidem vehementia , ut vix extra lectum æger per binas , ternasve septimanas esse potuerit.

Balnea & diversa alia remedia juverunt nihil.

Jussi sumpto purgante ex rhei scrup. ij. & salis polychresti dr.  $\beta$  omni tem-

G

pore



pore autumnali , & vernali , tribus septimanis antequam dolores folerent eumprehendere , fumeret mane , & vefperi quotidie per quatuor feptimanas drachmam dimidiam ex pulvere de aconiti extracto , & faccharo.

Fecit hoc diligenter , & jam bini anni funt , quibus ab omni dolore liber eft.

Tempore confueto leves tantum , & momentaneas punctiones in partibus alias læfis advertit , & extremitates folito magis tranfpirant.

Vires autem manent bonæ , & omnes corporis functiones integræ.

*CASUS TERTIUS.*

**F**œmina, 43 annorum, vagos dolores rheumaticos jam a pluribus annis passa est, hi se sensim figebant in omnibus corporis articulationibus, ita quidem, ut fere omnia membra fierent rigida, & cogeretur ægra continuo lecto inhærere.

Remedia quæcunque tentata juvabant nihil, imo plurima eorum magnos dolores excitarunt.

Suasi pulverem de aconiti extracto, & saccharo.

Mox sensit levamen, cœpit per totum corpus transpirare, redibat articulorum motus, & nondum finito integro curationis mense jam extra lectum potuit ambulare, sensim dein omnes cor-

poris functiones restauratæ sunt, vires fiebant bonæ, & post secundum mensem aderat integra sanitas.

Hæc ægra præter aconiti extractum cum saccharo nihil assumsit, & dosis tantum fuit scrup. i. mane & totidem vespere.

### *CASUS QUARTUS.*

**V**ir, 30 aliquot annorum, malo venereo jam olim sæpius affectus, tophaceos tumores in capitis parte capillata, in fronte, & in sterni osse habuit.

Applicatæ ei sunt frictiones mercuriales, apposita emplastra mercurialia, præterea dabantur decocta fortissima.

Hæc cum non prodesse varia sub forma ipsum mercurium assumsit; hunc  
autem



autem æger ferre non poterat, etenim inde pectus angebatur, & orta est tussis vehemens cum capitis dolore.

His tentatis æger me vocavit. Conqueriebatur tunc ingentes dolores præfertim nocturnos in tophis, & omnibus fere membris.

Dedi ipsi purgans ex jalap. granis XL & fal. polychrest. granis XX.

Dein exhibui mane & vesperi grana XX pulveris de aconiti extracto, & saccharo, fecique, ut semper desuper biberet vascula bina decocti radicis bardanæ.

Spatio quatuordecim dierum evanuerunt omnes dolores, somnus nocturnus fuit longe tranquillior, appetitus bonus, tumores videbantur molliores, minores.

Auxi tunc dosim, & ter quotidie dedi drachmam dimidiam pulveris.

Hac dosi intra binarum septimanarum spatium nihil mutabatur.

Exhibui dein ter quotidie binos scrupulos hujus pulveris, sed neque hac dosi quidquam mutatum fuit, licet per plures septimanas continuaretur.

Cum igitur malum pertinax ex lue venerea traheret originem, cumque solum aconitum non sufficere videretur, exhibui ter quotidie drachmam dimidiam ex pulvere sequenti.

℞. Extract. aconit.

mercur. dulc. aa gr. iv.

facch. alb. unc. β

m. f. pulv. tenuissimus.

Hoc medicamentum tantam habuit efficaciam, ut intra unum & dimidium men-

menſem omnes tumores evanuerint, & homo bonam haberet ſanitatē absque ullo doloris ſigno.

Tulit hac ratione mercurium, quem alia forma aſſumere non poterat. Juncta ſimul juverunt.

### CASUS QUINTUS.

**F**œmina, 38 annorum, ex lue venerea ingentes in omnibus membrīs dolores habuit, plura quoque, & foediſſima ulcera exedebant os frontis, oſſa naſi, humerum dextrum, & utramque tibiam. Conſueta antivenerea remedia nil effecerunt.

Tentavi, propterea aconiti extractum, & externe ulceribus ſuperimpoſui cicutæ emplaſtrum.



Mox sedabantur dolores , & ulcera pus bonum fundebant.

Spatio quatuor mensium ulcera erant omnia consolidata , & optima fanitate fruebatur hæc foemina.

Bis solummodo datum fuit purgans ex gr. XL jalap. & gr. xx sal. polychr.

Præterea assumfit nihil , nisi pulverem ex aconiti extracto , & saccharo.

Hanc solum aconiti extractum a lue venerea liberavit.

### *CASUS SEXTUS.*

**H**omo , 26 annorum , febre hungarica diu divexatus , tandem longo remediorum usu inde liberabatur.

Fugata hac febre pertinax dolor rheumaticus omnia ejus membra prehen-

hendit, deerat appetitus, corpus emaciabatur, languerunt vires.

Copiosum serum lactis, varia decocta, pulveres diaphoretici, & alia multa medicamenta levare hunc morbum nequaquam poterant, & medici assistentes timebant tabem.

Petebatur demum a me consilium.

Suasi, ut ter de die fumeret grana viginti ex pulvere de aconiti extracto, & saccharo, & qualibet vice biberet desuper jusculum, vel tenue qualecunque infusum.

Intra hebdomadis spatium minuebantur dolores, invaluit appetitus, augebantur vires, & somnus fiebat tranquillus.

Vix præterlapfi sunt bini menses, & aderat integra sanitas.

Præter hoc remedium datum est nihil, neque augebatur dos, quum optatus aliunde effectus sequebatur.

### CASUS SEPTIMUS.

**F**œmina, 50 aliquot annorum, sensit jam a pluribus annis dolorem dilacerantem in toto latere sinistro, & propterea brachium, & pedem ejusdem lateris movebat difficulter.

Circa temporis ærisque vicissitudines hi dolores subinde adeo fiebant vehementes, ut ægra debuerit se lecto committere per plures dies.

Balnea & remedia varia nullum adferebant levamen.

Dum me accedebat hæc ægra, dedi purgans ex granis XL jalap. & granis xx salis polychresti.

Dein



Dein jussi, ut fumeret mane, & vesp̄i dr.  $\beta$  de pulvere ex aconiti extracto, & saccharo, & biberet desuper vascula bina infusi florum sambuci.

Post octiduum membrorum motus erat liberior, & dolores longe minores.

Post tres septimanas ægra jam integre videbatur curata.

Jussi tamen, ut adhuc eodem remedio uteretur per unam alteramve septimanam, ne facilis fiat recidiva.

### CASUS OCTAVUS.

**P**uella, 10. annorum, pessima spina ventosa laborat in metacarpo manus sinistrae, & in dorso pedis sinistri.

Tentatis plurimis internis externisque remediis sine effectu, me accessit, tota emaciata, debilis, & cachectica.

Præ-

Præscripsi ei pilulas de cicutæ extracto, & pedem, ac manum cicutæ infuso curavi foveri per diem, & tegi noctu emplastro de cicuta.

In pede malum brevi emendabatur, & mensis spatio tumor totus disparuit, & ulcus, quod foedum erat, fuit penitus consolidatum.

Dosim dein extracti cicutæ auxi ita, ut grana XL per diem assumpserit, & externis iisdem remediis fuit continuatum.

Vires redierunt, & bonus color, & appetitus, verum in manu manfit tumor lividus, exulceratus, foetidum ichorem fundens, nec manus digiti poterant moveri.

Utebatur iisdem remediis per plures septimanas, sed malum in manu nequaquam fuit levatum.

Hinc

Hinc ad aconiti extractum deveni, & præbui mane, ac vesperi gr. xv pulveris de aconiti extracto & saccharo, cum per plures dies hanc dosim sine molestia tulisset, jussi ter quotidie fumeret grana xx ex eodem pulvere.

Externe continuo applicatum fuit fomentum de cicuta, & noctu emplastrum.

Hoc remedio mox dolores imminuti sunt, color lividus sensim in naturalem mutatus est, subsedit tumor, secesserunt fragmenta ossea, liberior fiebat motus digitorum.

Per plures menses idem remedium assumsit, & malum fere integre sublatum est, & puella cæteroquin optime valet.

Dosim extracti aconiti auxi, ut jam quotidie bina, vel & tria grana hæc puella deglutiat, & fert ea sine incommodo.

CA-



*CASUS NONUS.*

**V**ir nobilis, dolore podagrico vehementissimo jam a multis annis omnivernali & autumnali tempore vexabatur, vires inde amisit, nec suo officio debito modo potuit fungi.

Cum infinita assumfisset remedia sine levamine, me consuluit, tempore quo laborabat vehementissimis doloribus.

Jussi ter quotidie fumeret drachmam dimidiam pulveris de extracto aconiti & saccharo, & desuper biberet vel jusculum, vel tenue qualecunque infusum.

Primo statim die minuebantur dolores, & ortus est sudor copiosus.

Tertio die ab omni dolore liber fuit. Malum hoc alias per plures septimanas duravit, usus dein est æger adhuc per mul-

multos dies eodem remedio , ut omne acre subigeretur ; & jam ultra biennium hoc morbo non amplius affligitur.

Bis tantum levia mali principia fenfit, quamprimum autem unam vel alteram pulveris dofim affumit, filet malum, fanitas bona eft, & vires integræ.

### CASUS DECIMUS.

**V**ir, 40. annorum , a fubita refrigeratione febre rheumatica admodum vehementi præhenditur.

Datis remediis neceffariis ceffavit febris , verum dolores membrorum , & fere totius corporis manferunt æque acerbis.

Unde externe frictiones aromaticæ , & fpirituofæ applicatæ funt, hæc liberabant quidem artus a dolore , fed caput  
ve-

vehementer adeo afficiebatur, ut æger diu noctuque ejulaverit.

Assumpta decocta fortissima, factæ venæ sectiones, data purgantia, applicata vesicatoria, & balnea pedum juverunt nihil.

Dum uxor ad me veniret petitura pro marito auxilium, præscripsi pulverem de aconiti extracto & saccharo, ut ter quotidie fumeret grana XL, & biberet desuper bina vascula decocti emollientis.

Cœpit inde æger sudare, & mox caput levabatur, spatium octidui filuit omnis dolor, rediit appetitus, somnus; restauratæ sunt vires, & sensim æger optime convaluit, meque accessit acturus gratias.



*CASUS UNDECIMUS.*

**F**œmina, 34. annorum, lue venerea laboravit, & inde remediis mercurialibus curata fuit.

Medio anno a curatione cœpit præter causam sibi notam dolore admodum vehementi affici in omnibus articulationibus, noctes ob dolorem habuit plerumque infomnes.

Credebatur hoc adhuc residuum esse a prægressa lue, unde datis purgantibus priora iterum ex mercurio parata remedia fuerunt exhibita, nil autem levaminis inde ægra fenfit, debilitata est, & emaciata.

Varia dein decocta magna dosi assumfit, verum nec hæc juverunt.

Suasi tunc cicutæ extractum, & ilico dedi ter quotidie grana xx., appetitus inde augebatur, & vires increverunt, & mens facta est hilarior, dolores autem æque vehementes perstiterunt, licet integromense hoc remedio diligenter usa fuerit ægra.

Hujus loco dein dedi pulverem de saccharo & aconiti extracto, & sumfit ægra ter quotidie drachmam dimidiam.

Hoc remedio per quatuordecim dies utebatur sine levamine.

Tentavi tunc, quid hæc juncta simul possent, & præscripsi pilulas sequentes:

℞. Extract. cicut. unc. β

extract. aconit. dr. β

m. exacte, ut fiant pil. gr. iij.

S. sumat ter quotidie tres pilulas.

His

His intra bidui spatium dolores multum mitigati sunt, & somnus nocturnus fiebat tranquillus.

Spatio trium septimanarum ægra integram sanitatem recuperavit, nec ulla amplius doloris signa advertit.

Jam octo menses sunt, quibus optime valet.

### CASUS DUODECIMUS.

**H**omo, 30. aliquot annorum, pertinacissimo capitis dolore jam pluribus annis laboravit. Causam rejecit in prægressos artuum dolores, quibus balneo dispulsis, caput dolere cœpit.

Postquam plurima interna, & externa remedia diu adhibuisset sine levamine, tandem salivationis curam subivit, neque



inde levabatur, neque alia fortissima mercurialia profuerunt.

Dedi huic mane duo grana extracti aconiti cum drachma dimidia sacchari, eandem dosim vesperi iterum exhibui, & solum jusculum carnis jussi, ut superbibat; mox minuebatur dolor, & spatio quartuordecim dierum homo liber erat a toto morbo, & sanus vivit. Licet prius infinitis remediis, & emplastris fuerit mirum in modum divexatus.

### *CASUS DECIMUS TERTIUS.*

Juvenis, 25. annorum, dolore ischiatico lateris sinistri per plures septimanas vehementissime exagitabatur, hoc demum remittente coepit femur & crus totum extenuari, & motus pedis fere impossibilis fieri.

Fri-

Frictiones, balnea, scarificationes, vesicantia aliaque acria irritantia nil juverunt; nec ullum effectum produxerunt remedia interna, caro omnis evanuit, & mera ossa, & tendines supererant.

Hinc dedi granum unum extracti aconiti cum saccharo mane, & unum vesperi.

Spatio sex septimanarum rediit caro, & torositas ita, ut crus unum alteri sit simillimum.

Æger inde fortiter purgatus est, & multum sudavit.

### CASUS DECIMUS QUARTUS.

**F**œmina, 40. annorum, jam in octavum annum lue venerea laboravit, in omnibus corporis ossibus tophos habuit exulceratos, maxime vero in ster-  
no; fauces præterea quoque erant ex-

ulceratæ, & velum pendulum totum ex-  
esum, cibi & potus per nares redie-  
runt.

Omnes luem veneream curandi me-  
thodi in hac ægra tentatæ sunt, & inde  
curabantur multa ulcera, & tóphi pluri-  
mi disparuerunt, fauces autem, & os  
sterni æque in malo statu permanferunt,  
neque dolores nocturni sunt imminuti, un-  
de ægra vires suas amisit.

Consideratis omnibus putavi: fore,  
ut forsan aconiti extractum rebelle hoc  
malum auferret.

Exhibui ideo ter quotidie granum u-  
num hujus extracti cum dimidia drachma  
sacchari, & desuper vascula bina deco-  
cti radicis bardanæ, quo alias jam largi-  
ter utebatur.



Dolores nocturni brevi mitigati, & sedati sunt, & ulcera omnia in melius mutata; ægra cœpit quietius dormire, membra facilius movere, appetere, recuperare vires.

Speravi hoc remedium solum fore sufficiens ad curam perficiendam; verum sublatis doloribus nocturnis stetit malum, nec tumores sunt amplius diminuti, nec ulcera consolidata, licet extracti dosim auxerim, & ejus grana sex dederim quotidie per quinque septimanas.

Præscripsi propterea sequentem pulverem.

℞. Extract. aconiti

mercurii dulcis aa gr. vj.

sacchari albi dr. iij.

m. f. pulvis tenuissimus.

S. fumat ægra ter quotidie drachmam dimidiam, & bibat desuper vel jusculum vel infusum qualecunque.

Ufu hujus pulveris intra binos & dimidium menses disparuerunt omnes in ossibus tumores, separata sunt magna ossium fragmenta cariota, coierunt ulcera, partes deperditæ ex velo pendulo & uvulo recreverunt, ita, ut ægra optime deglutiverit, & voce distincta potuerit loqui.

Sana dein labores suos iterum rite peregit.

### COROLLARIA.

**C**onfirmatur igitur, aconiti extractum tuto & salubri cum effectu dari ægris.

Potenter id solvit, & tumores dissipat, & subinde cicutam virtute superat.

Tollit dolores arthriticos, rheumaticos, podagricos.

Movet transpirationem, & sudorem.

Morbum venereum curat subinde, ubi alia remedia usitata non juvant.

Junctum cum æquali portione mercurii dulcis efficacius quandoque est, quam omne remedium mercuriale, licet fortissimum.

Junctum cum extracto cicutæ juvat subinde, ubi ambo seperatim data nil efficiunt.

Prodest quandoque in amaurosi & cataracta, & cephalæa.

Ejus usus per multos menses protractus ægris nullam unquam noxam attulit.

H 5

Dosis



Dosis est a grano dimidio per diem, usque ad grana quatuor, quinque, vel sex &c.

---

## C A P U T VI.

---

### *De Hyosciamo.*

**E**xtractum hyosciami in priori opusculo laudavi contra spasmos, melancholiam, maniam, epilepsiam.

Factis experimentis vidi hæc optime confirmata, non ita tamen evidenter, ut hoc remedium in hisce morbis universale, & infallibile deprædicarem, sed possum justo modo concludere: prodesse quandoque, ubi aliud nullum remedium juvat.

*CASUS PRIMUS.*

**P**uella, 8 annorum, febre acuta continua laborat, dolet vehementer capite, multum fitit, pulsum habet durum, ita, ut ter debuerit secari vena.

Quarto die erupit exanthema scarlatinum cum maximo morbi levamine.

Cesserunt omnia optime usque ad diem septimum, quo subito convulsio- nibus puella corripiebatur, & forti delirio, jactitavit se, & tristi voce clamavit continuo.

Pulsus tunc erat debilis, inæqualis, non tamen admodum velox, alvus sponte solvebatur bis infcia ægra, prodiit quoque urina admodum foetida in lectum, ægra quocunque modo rogata nil respondit, neminem cognovit, exan-  
thema

thema scarlatinum totum disparuit, oculi lachrimabantur; pectus tamen satis liberum videbatur, oblata difficulter admodum deglutivit.

Curavi vesicantia furis & nuchæ apponi, & plantis pedum epispastica, mixturæ priori, quæ erat antiphlogistica, addidi paucas guttas spiritus cornu cervi, & drachmam dimidiam tincturæ succini.

Emplastra vesicas largas adtraxerunt, nil autem in morbi statu inde mutatum fuit, nox fuit inquietissima, & convulsiones, tendinum subsultus corporisque jactationes continuæ, nec desinit ingratus clamor.

Jussi iteretur prior mixtura, sed admiscui simul drachmam dimidiam laudani liquidi, ut hac ratione in nervis  
motus



motus perturbatus aliquantulum componeretur.

Verum æque parum effeci, manserunt omnia mala symptomata, & nox iterum infomnis fuit.

Tentare propterea volui, quid hyosciami extractum hoc in casu posset.

Præscripsi iterum eandem mixturam, quam habuit die præcedenti, solummodo adjeci grana quinque extracti hyosciami.

Vix tria cochlearia sumfit ex hac mixtura, & jam minuebantur convulsiones, desierunt tendinum subsultus, clamor erat minus frequens, & corpus magis quietum.

Circa vesperras sequebatur somnus trium horarum, ex hoc evigilans coepit potum petere, & novit matrem & adstantes,

stantes, vix amplius deliravit, clamor desit penitus, & raro advertebatur in facie, brachiis, & pedibus convulsio.

Nox dein fere tota pacata fuit, & matutino tempore sibi ægra erat optime præsens, pulsus erat æqualis, vix febrilis, sitis pauca, oculi vivi, caput autem vehementer dolebat, & membra languebant, petiit ægra juscum cum pane, & aquam pro potu.

Continuavi adhuc per binos dies eandem mixturam, & nullum amplius malum symptomata observabatur, vires paulisper insurgebant, augebatur appetitus, restauratæ sunt functiones, & rediit sanitas absque alio remedio.

## CASUS SECUNDUS.

**V**ir, 40 annorum, subito corripiebatur cordis palpitatione vehementissima, simul supervenit dolens admodum in brachio sinistro convulsio, inhibebatur respiratio, & aderat magnum suffocationis periculum.

Instituitur iterata venæ sectio, adhibenturque remedia, quæ malo præsentimmederentur.

Mitigata inde sunt symptomata, cordis motus fiebat magis regularis, brachii convulsio cessavit, & sat bene se habuit æger per plures horas.

Dein autem idem malum per vices eadem vehementia rediit; noctu quoque somnus turbabatur.

Post-



Postquam per plures dies remedia interna externaque varia sine effectu tentassem, exhibui tandem hyosciami extractum.

Dedi grana duo mane, duo ad meridiem, & totidem vesperi.

Primo statim die paroxysmus neque ita frequens, neque adeo fortis fuit.

Secundo die cordis palpitatio cessavit penitus, in brachio vix ulla convulsio advertebatur, pectus fuit minus anxium, & nox somno reficienti transigebatur.

Tertio die æger cœpit appetere, vagos tantum in brachio tendinum subsultus sensit, cordis motus vix unquam turbatus observabatur, nox iterum tranquilla fuit.

Quarto

Quarto die æger bene se habuit, & sanæ erant omnes functiones.

Continuavit eandem extracti dosim adhuc per quinque dies, & cum dein optime valeret, abstinuit ab omni remedio.

Bini nunc anni sunt, quibus optima sanitate fruitur.

### CASUS TERTIUS.

**F**œmina, 30 aliquot annorum, malo hysterico enormiter exagitata a pluribus annis, incidit in profundam melancholiam, & omni momento timuit, ne a diabolo raperetur, vel duceretur ad carceres, & damnaretur ad mortis supplicium.

Antihysterica remedia omnis generis assumpsit diu, aërem habitationisque locum sæpius mutavit, & in vivendi ra-

I

tione

tione evitavit ea omnia, quæ vel eminus nocere videbantur.

Ast malum nullo modo levabatur.

Feci propterea, ter de die assumeret granum unum extracti hyosciami; utebatur hoc remedio per octiduum citra ullam morbi mutationem.

Jussi dein bina grana ter quotidie deglutiret; mox sensit se liberius respirare, nec adeo esse anxiam, noctu sine multis insomniis suaviter dormivit, & coepit cibos appetere, a quibus antea abhorruit.

Assumfit dein ter quotidie grana tria hujus extracti, & hac dosi spatio viginti dierum integre restituta fuit.

Rediit hæc fœmina ad me post binos a curatione menses, optime se habens, & rogavit solummodo an non pur-



purgans assumeret, cum tempus esset vernale, quo assueta esset purgari, verum id dissuasi, cum nullum viderem signum, quo indicaretur, & partim timebam, ne in sano corpore quidquam turbaretur.

*CASUS QUARTUS.*

**H**omo, 44 annorum, studiis plurimum deditus, malo hypochondriaco multum vexabatur, & tandem eo devenit, ut noctu nil posset dormire; etenim, etiamsi somno prederetur per unum alterumve minutum, evigilabat iterum subito convulsus inter summas anxietates, & horrendos spectrorum timores, & calores urentes per totum corpus.

Cum hæc jam per plures septimanas durassent, coepit contabescere, & multum debilitari.

Varios consuluit medicos, data ei sunt remedia, quæ similibus in morbis cæteroquin optima sunt, & quoniam vesperti advertebatur pulsus paulo intensior, calorque corporis naturali auctior, adhibita tunc sunt medicamenta nitrofa, emulsa, refrigerantia, & nec hæc ullum adferebant levamen, ideo data sunt parégorica, & dein fortiora opiata.

Verum his potius anxietates, insomnia, & morbi symptomata augebantur.

Consului tunc, ut mane grana duo extracti hyosciami assumeret, & totidem vesperi.

Sensit statim primo die pulsantem , & urentem in toto corpore calorem imminui , advertit vagos per membra , & in spina dorfi horrores , noctem autem æque infomnem transegit.

Altero die ad meridiem habuit magnum comedendi desiderium , noctu per exigua intervalla dormivit , reliquo autem tempore vexabatur anxietate , ut antehac.

Tertio die dedi mane & vesperi grana tria extracti hyosciami ; ad meridiem appetitus fuit iterum bonus , & nox insequens multo tranquillior , & æger longe reddebatur hilarior.

Continuabatur dein eadem dosi , & diminuebantur omnia morbi symptomata quotidie , & post decem circiter dies æger sanissimi instar dormivit per septem



vel octo horas sine ulla interruptione, reficiebatur inde plurimum, & post tres septimanas integram sanitatem recuperavit.

### CASUS QUINTUS.

**A**ncilla, 20 aliquot annorum, a medio anno vexabatur omni quarta, vel quinta nocte versus quartam matutinam convulsione per totum corpus, & inde debilitabatur.

Mali causam ignoravit.

Exhibui ei pilulas ex gummi ferulaeis, ex asa foetida, castoreo, & pauca camphora.

In principio malum inde fiebat minus vehemens, verum postea erant convulsiones multo fortiores.

Tentavi dein corticem peruvianum magna dosi per octiduum, nil autem levaminis advertebatur.

Quare ad extracti hyosciami usum deveni, & dedi ter quotidie granum unum hujus extracti.

Hac dosi per plures dies nil efficiebatur, unde dedi ter quotidie grana duo.

Advertit tunc ægra paroxysmos paulo tardius incipere, symptomata autem erant æque vehementia.

Dedi dein ter quotidie tria grana, & hac dosi factum fuit, ut ægra per duodecim dies nullum haberet paroxysmum, & jam se ab hoc malo liberam putabat.

Verum tunc per binas noctes agitabatur fortissimis convulsionibus, & vires penitus sunt prostratæ.

Hinc auxi dosim & ter quotidie grana quinque hujus extracti exhibui.

Ab eo tempore vires auctæ sunt, & nullus amplius paroxysmus observatus est, hac dosi per integrum mensem ægra continuavit uti, & cum dein se penitus sanam adverteret, abstinuit.

Rediit ad me post tres menses a curatione, egit adhuc gratias, & fruebatur optima sanitate.

### CASUS SEXTUS.

Juvenis, 18 annorum, tussi sicca, titillatoria, continua, diu noctuque agitabatur, pectore vehementer doluit, & merito timebatur hæmoptoë.

Quæcunque data remedia nihil prorsus emendabant, emollientia, glutinosa, paregorica, opiata nec minuere poterant tussis vehementiam. Ten-



Tentavi propterea quid hyosciami extractum posset, & addidi mixturæ, qua æger jam per sesqui diem sine effectu utebatur, grana decem hujus extracti.

Post tria cochlearia cœpit minus tussire, dolor pectoris minuebatur, & sequebatur somnus tranquillus per integram horam.

Æger inde multum reficiebatur, & tussiebat longe liberius, & minus frequenter, unde eodem remedio continuatum fuit.

Nox erat tranquilla, & altero die rara admodum tussis observabatur, æger cœpit appetere, & tantum omni trihorio cochleare unum ex hac mixtura sumfit.

Nox iterum tranquilla fuit, & dein vix amplius ullo remedio opus erat,

cum tussis cessasset, & æger se bene haberet.

### *CASUS SEPTIMUS.*

**V**ir, 40. annorum, sanus semper & robustus, incidit in profundam melancholiam, quum eum honoris gradum non obtinuit, quem petiit, & ambiebat.

Melancholia transiit in veram maniam, & æger mox se Generalem credidit, mox se Legatum ad primas aulas dimittendum dixit, mox se in Regem variarum regionum elegit.

Multorum medicorum consilia adhibebantur, parcebatur nullis sumptibus, & cum remedia non juvarent, rudius tractabatur, & feveris minis.

Inde autem furibundus factus est, & nulla in re obedivit, & quidcunque medic-

dicamenti titulo offerebatur, vi respuit.

Suasi tunc, ut in jentaculi, & cœnæ ferculis solveretur hyoscyami extractum, & hac ratione dolo ingereretur.

Sumfit tali modo mane grana quatuor hujus extracti, & totidem grana vesperi.

Hæc dosis sufficiebat ad falsas ideas penitus delendas; etenim intra paucos dies omnia mutabantur in melius, & tandem mentis ratio & judicium perfecte redierunt.

Sanatus Vienna discessit, & jam plures mihi scripsit epistolas, rite combinatas, quibus se optime valere testatur, idem & sui amici grato animo confirmant.

### COROLLARIA.

**E**xtractum hyoscyami tuto datur  
ægris.

In-



Incipiendum autem est semper parva dosi, uti cum aliis similibus remediis fieri suadeo.

Nervorum inordinatos motus compefcit, hinc convenit in convulsionibus, & spasmis hyftericis, ac hypochondriacis.

Somnum & quietem inducit, ubi sæpius opium id non efficit, hinc in nimis vigiliis indicatur, ubi sopiendum est.

Perverfas mentis ideas delet, mentis furiem componit, hinc in mania & rabie sæpe mira præstat.

Vehementissimam tussim ab irritatione ortam quandoque compefcit, & hæmoptoën.

C A P U T VII.

---

*De Colchico autumnali.*

**E**x recenti & succulenta hujus herbæ radice parari acetum, & inde fieri cum melle simplici oxymel colchicum, in priori de colchici autumnalis radice libello asserui.

Quo succulentior est hæc radix, eo est efficacior; hinc potius colligi debet in principio æstatis.

℞. Radicis colchici recentis, succulentæ, in tenues taleolas sectæ. unc. j.  
aceti vini. lib. j.

Hæc lento igne in phiala vitrea invicem digere per quadraginta octo horas, sæpius tamen phialam agitando; dein colaturam leviter expressam exhibe.

Sic

Sic paratum habes acetum colchicum, quod pro vario usu asservari potest vase bene clauso, ex hoc dein paratur oxymel colchicum.

℞. Aceti colchici rite parati. libr. j.  
mellis pur. libr. ij.

Misce, & supra molli igne, sæpius agitando cochleari ligneo, coque ad mellis consistentiam.

Docui variis experimentis, hoc oxymel colchicum incidere glutinosum, promovere sputa, pellere urinam, & hac ratione plures inde morbos posse curari, qui aliis consuetis remediis non obediunt.

Experimenta nova confirmant priora.



CASUS PRIMUS.

**P**uella novem, & puer octo annorum laborant febre scarlatina.

Ex hoc morbo curati, fiunt ambo hydropici per totum corpus.

Medicus, qui in febre curam gessit, omnem quoque operam impendit, ut hunc quoque morbum tolleret.

Verum frustra tentabantur omnia, & puella aquis suffocata obiit.

Casu fortuito vocabar ad scēminam, quæ in eadem domo ægrotabat, parentes ratione pueri hydropici meum consilium implorabant.

Is multum tussivit, erat pectore anxius, scrotum erat fere æque magnum ac infantis caput, penis pellucido tumore in magnam molem accrevit, nul-

la

la prodibant sputa, & urina pauca, rubra, stranguriosa.

Præscripti oxymel colchicum, ut quatuor vicibus per diem puero darent drachmam unam & dimidiam in infuso florum rheados.

Sputa statim liberius rejecit, sensitque magnos ad urinam tenesmos, vix tamen plus urinæ fluxit.

Cum per tres dies alvo careret, dedi binas uncias fyrupi mannati, & drachmam unam salis polychresti, ut unico haustu assumeret.

Quinques inde purgatus fuit, neque tamen venter, qui tensus admodum, & inflatus erat, detumuit, neque in aliis partibus levabatur morbus.

Jussi dein exhiberent iterum oxymel colchicum & darent duplam dosim in eodem infuso.

Uri-

Urina tunc cœpit copiose & sine ardore fluere, alvus solvebatur quotidie, prodibant sputa, respiratio fiebat liberior, cœpit æger cibos appetere, bene dormire, & spatio quatuordecim dierum integre convaluit.

### CASUS SECUNDUS.

**V**ir, 60 annorum, asthmate laborans, & ventris hydrope, & pedum magno duroque tumore, postquam jam a medicis pluribus esset derelictus, meum consilium rogavit.

. Suasi, ter quotidie fumeret unciam dimidiam oxymellis colchici in vasculo infusi hyssopi.

Mox sensit levare pectus, prodire sputa crassa, flava, & subinde viridia, fluxit copiosa urina, & alvus bis terve

K quo-



quotidie solvebatur cum morbi tanto levamine, ut æger in quarta, qua hoc remedio utebatur, septimana me solus accédere potuerit, habens sat bonas vires, vix amplius tussivit, & aberat omnis tumor.

Jussi minori dosi adhuc per binas septimanas idem remedium assumeret, & hac ratione convaluit.

### CASUS TERTIUS.

**F**œmina, 63 annorum, anasarca laboravit, & simul ascite, pectore erat ita anxia, ut citra summam difficultatem, & suffocationis metum vix ambulare, minus adhuc gradus ascendere potuerit.

Præscripsi oxymel colchicum, ut inde omni bihorio fumeret drachmam instar linctus.

Mox

---

DE COLCHICO AUTUMNALI. 147

---

Mox copiosiore[m] sensit urinæ fluxum, alvus quoque aliquoties movebatur quotidie.

Spacio octidui tumor omnis longe minor videbatur, & pectus liberius, pedesque magis mobiles.

Jussi postea, ut omni bihorio fumeret binas drachmas de oxymelle colchico.

Hac dosi spacio quinque septimanarum omnis in artubus tumor disparuit, venterque ad exiguam mole[m] est reductus.

Continuavit adhuc idem remedium per binas septimanas, sed major effectus non evenit; remansit adhuc semper in Ventre tumor fluctuans, neque urina adeo copiose fluxit ut antea.

Scripsi propterea sequentem formulam:

K 2

R.

R. Terr. foliat. tart. dr. ij.  
oxymell. colchici unc. v.  
Spir. nitri dulc. dr. ij β

M.

S. omni bihorio drachmas duas  
fumat.

Hac ratione longe major urinæ copia prodiit, & ventris moles præternaturalis evanuit.

Cum autem appetitus languerét, addidi adhuc priori formulæ drachmas duas tincturæ helenii.

His solis rediit appetitus, vis vitæ, & sanitas.

### CASUS QUARTUS.

Vir nobilis, 64 annorum, jam a pluribus mensibus insultu asthmatico vexabatur, sensitque respirationem  
in-



inhiberi, dum fortius incederet, vel gradus ascenderet, vel majori emphasi loqueretur.

Magna cura & adtentione adhibebantur omnia remedia, quæ ad debellandum anxium hunc morbum videbantur indicata.

Malum tamen continuo augebatur, & miser se debebat lecto dare.

Insultus asthmatici fiebant adeo vehementes, ut facies tumeret, liveret, prominèrent oculi, & ruberent, & loquela erat penitus impedita, ronchorosus in aspera arteria strepitus suffocationem minitabatur.

Jungebant se vera hydropis pectoris signa, & extrema intumuerunt, deerat omnis appetitus, somnus erat anxius, interruptus, defatigans, extrema frige-

bant fere semper, pulsus erat debilis, & intermittens; ego monebam amicos de mortis periculo, &, ut verum fatear, vix ullam curationis spem amplius superesse putabam.

Quo efficaciora dedi remedia, eo pejus se habuit æger, & quamvis fuerit in assumendo exactus, & diligens, coepit tamen a medicamentis abhorrere.

Cum igitur parca dosi oxymel colchicum magnos quandoque effectus præstaret, id exhibui, dedique omni bihorio duo parva cochlearia (caffée-Löffel voll.)

Primo die nil mutatum inveni.

Secunda die coepit copiosa urina prodire cum multo muco, & tussiendo rejiciebatur subinde sputum rotundum, nigrum, vel cæruleum, membranaceum

peni-

penitus, & strepitus in aspera arteria minuebatur.

Continuavimus eadem dosi, & malum brevi levabatur, paroxyfmi asthmatici erant minus longi, minus anxii, & sputum illud nigrum rotundum, membranaceum copiosius prodiit, solvebatur alvus sponte.

Nulla alio remedio opus fuit, hoc enim solo vir nobilissimus ex manifesto mortis periculo evasit, & spatio binorum mensium integre convaluit.

Jam ultra annum sanus est, & suo officio, quod multum studii, & operis exigit, optime fungitur.

### CASUS QUINTUS.

**P**uella, 13. annorum, ventrem & pedes tumidos admodum habet, & re-



spirationem anxiam cum brevi & frequenti tussicula; ad minimum motum cor dira palpitatione agitabatur, misera noctu sæpius subito evigilavit, & semper erecto trunco debet lecto inhærere.

Postquam vidissem multa, & egregia medicamenta a medicis huic ægræ esse incassum administrata, transivi illico ad oxymellis colchici usum.

Jussi omni trihorio fumeret drachmam unam.

Urina inde non movebatur, sed alvus coepit fluere, & ægra debilitabatur; respiratio fiebat pejor, & reliqua mala symptomata augebantur.

Indicatio pellendi urinam urgebat; nullo medicamento, quod minori dosi ageret, neque esset violentum, novi præter oxymel colchicum, cavendum igitur erat,

erat, ne alvus flueret nimium, & potius viæ urinariæ aperirentur.

Præscripsi igitur

℞. Syrup. papav. alb.

oxymell colchici ana unc. j. β

M.

S. fumat omni trihorio parvum cochleare (caffee-Löffel voll.)

Alvus inde non movebatur, & oriebantur mingendi conatus.

Altero die prodiit multa urina subfusca.

Tertio die ægra melius habuit, & urinæ fluxus continuavit, alvus autem retinebatur & quarto die ad eam movendam enemate opus erat, cum ægra tormina sentiret, borborygmos, & innanes alvi tenesmos.

Dedi dein omni bihorio parvum cochleare ex hoc remedio.

Hac ratione intra sex septimanas tumor omnis disparuit, pectus fuit liberum, vires auctæ sunt, bonus erat appetitus, somnus sat tranquillus, & rara admodum cordis palpitatio.

Hysterici motus subinde observabantur, hi autem remediis nervinis antihysteriis brevi sunt compositi.

### CASUS SEXTUS.

**F**œmina, 50. annorum, ventris hydropæ laboravit, & tussi admodum vehementi jam a multo tempore, extrema non tuebant.

Dum me accessit, præscripsi illico oxymel colchicum, ut linctus instar omni bihorio fumeret parvum cochleare.

Sputa



Sputa mox copiosa prodierunt, & observabatur frequens ad urinam impetus, fluxit autem urinæ pauca copia.

Cum per sex dies vidissem hanc dosim, ratione ventris, nil efficere, jussi omni quadrihorio unciam dimidiam fumeret.

Mox inde tanta urinæ copia fluxit, ut merito timeretur, ne ficcum fieret corpus, unde per aliquot dies debuit penitus abstinere.

Dein autem parva dosis ad integram curationem suffecit.

### *CASUS SEPTIMUS.*

**A**ncilla, difficillima respiratione pedumque ac ventris tumore laborans, per multas septimanas optimis usa est remediis sine ullo levamine, imo mutabantur omnia in pejus.

Ex

Ex oxymellis colchici usu mox facilius respiravit, rejecit sputa, copiosam dimisit urinam, & intra breve tempus perfecte curata est.

### CASUS OCTAVUS.

**V**ir, 50. annorum, ex eodem remedio a pertinaci asthma, & ventris hydropo convaluit.

### CASUS NONUS.

**I**dem contigit vetulæ asthma adeo vehemente laboranti, ut vix aliquot gradus sine metu summo suffocationis potuerit ascendere.

Sputa copiosa, glutinosa, tenacia, fusca rejecit, & alvus aliquoties ei per diem movebatur.

CASUS DECIMUS.

**A**ncilla faciem totam œdematoso tumore inflatam habet a quatuor septimanis tanta mole, ut oculos aperire non potuerit, nec distincte loqui, nec debito modo cibos masticare, & deglutire.

Nec externa remedia, nec interna tumorem diminuebant; imo ægra fiebat vertiginosa & in soporem incidit, ita ut timendum esset, interna capitis quoque tumere, aut forsan quid extravasati ibi hære; applicata ad nucham vesicantia, quamvis multum serum adtraxissent, malum tamen non levabant.

Datum oxymel colchicum movit urinam, solvit bis aut ter quotidie alvum, ægra inde molestum in facie & toto capite pruritus sensit, mox autem tumor  
conci-



concidit, & intra decem dies misera convaleuit.

Sumfit mane, ad meridiem, & vespere unciam dimidiam hujus oxymellis cum vasculo infusi florum sambuci.

### C O R O L L A R I A.

**P**atet ex his, oxymel colchicum salutare admodum medicamentum esse, nec ullam ægris noxam adferre unquam, si a prudenti medico exhibeatur.

Glutinosum incidit, solvit, sputa promovet, pellit urinam.

Hinc in morbis pectoris, & in hydropse optime convenit.

Non tamen omnes pectoris morbos aut hydropes curat.

Sed prodest quandoque, ubi omnia alia remedia non agunt.

Quan-

---

## DE COLCHICO AUTUMNALI. 159

---

Quandoque etiam hoc remedium incassum datur.

Si a parva dosi inchoatur cura, tuto tunc agit medicus.

Datur a drachma una usque ad uncias duas aut tres per diem, sensim augendo dosim.

In robustis & bona viscera habentibus illico a magna dosi licet incipere.

Si hoc remedium alvum movet sine morbi levamine, tunc ei miscenda sunt opiata, & hac ratione agit per urinæ vias bono cum eventu.

Acetum colchicum egregium est resolvens externe applicatum, vidi hoc remedio magnum tumorem ad oculi finistri canthum internum dissipatum esse applicatione hujus aceti a dexterrimo ferenissimi Archiducis Leopoldi chirurgo *Brambilla*.

Vir-

Virtutem oxymellis colchici in curando hydropo mihi innumeris laudibus, & magna cum admiratione confirmavit doctissimus *Zach*, physicus & medicus ordinarius in magno hospitali militari, quod Pestini est; is enim multos hydropicos milites solo hoc remedio cito & facile curavit.

Idem adfirmat *celeberrimus Schinz* Tigurinus medicus, amicus meus plurimum venerandus, dicendo in præfatione, quam germanicæ versionis opusculi de radice colchici autumnalis addidit: jam plures ægri in nostro nosocomio sapientissima cura dignissimi nostri medici ac physici *Hirzelii* ope oxymellis colchici levati curatique sunt. Inter hos præsertim foeminam numero, quæ per quinque, & dimidium annos gravida erat, & infantem foemel-

lam



lam optime formatam in tuba Fallopiana gessit.

---

C A P U T VIII.

---

*Observata ab exteris communicata.*

**M**ulta ab exteris observata habere nunc non possum, quum continua itinera aulica, & morbus, quo diu & vehementer laboravi, non admiserunt, ut in colendo epistolarum commercio exactus essem, hinc multa debui negligere, & sæpius non poteram respondere debito tempore.

Dum anno elapso Francofurti eram, me pessimus icterus, & febris cum vo-

L

mitu

mitu admodum dolenti, & debilitanti detinuerunt.

Erant ibi plures medici, qui me sua præsentia sæpius honorarunt, nar-  
raruntque varias & magnas curationes,  
quas cicuta perfecerunt.

Inter alios sanabatur foemina, quæ  
a longo tempore ingentes in toto collo  
& circa aures tumores scirrhosos habuit,  
monstrosa inde penitus erat, ita qui-  
dem, ut in publico consortio comparere  
non auderet, liberata ab his fuit, &  
priorem formam recuperavit.

Hæc me accessisset gratias actura,  
si morbo detentus non decubuissem in  
lecto.

Gratissimo animo recordor Eruditissimi  
colloquii, quo celeberrimus Archiater,  
& Confiliarius Hesso-Homburgensis, Do-  
minus

minus de *Kaempfer*, mihi quotidie per plures horas morbi incommoda leviora reddidit, & mentem dejectam multum exhilaravit.

Is inter alias pulcherrimas observationes mihi casum sequentem de usu, & utilitate extracti aconiti transcripsit.

Mulier arthritica, cujus curationem tibi viva voce, paucis exponendi copia desiderata mihi fuit, a novem mensibus nulla indiget medicina, sanitate enim, quam tuæ inventioni debet, utitur integra.

Terras nunc laborat, quæ sine extracti aconiti usu immobilis fere lecto affixa esset. Mira certe præstitit in morbo hoc desperato. Silentio hinc prætereo leviores parotides induratas, cancrofas, ulcera maligna, rheumati-



mos &c. quos efficacissimo hoc remedio sanatos vidi.

Quinquagenaria hæc fœmina, viginti abhinc annis post infelix perpeſſum puerperium ſæpius articulorum doloribus oppreſſa fuit, thermas aliquoties adiit, unde parum boni reportavit, varia interna remedia adhibuit, quæ malum potius onerarunt, & denique in podagram nodofam tranſmutaverunt.

Solamen a me flagitans, digitos incurvatos, manus nodis mirum deformatas plane non movere, nec niſi ſuffulta deambulare valuit, dies noctesque diris dilacerata fuit doloribus. Hos aconiti extractum intra paucos dies mitiores fecit, prægreſſis per urinam, & alvum excretionibus crebrioribus, interdum virideſcentibus.

Ela-

Elapsis sex septimanis eam maxima lætitia perfusam reperi, de eo, quod post tot annos prima vice panem secare, fila lanæ ducere, & flexis genubus manibusque conjunctis preces dicere possit.

Sed quæ sunt hominum fata! Ipse libere per plateas ambulans, & gaudio triumphans occurrit petulanti asino, animali alias lento, & pacifico, qui tali impetu in eam irruit, ut os claviculæ, & femoris fracta reportaret.

Hoc novo malo brevi curata usum extracti aconiti strenue, & cum euphoria continuavit, consumpsit enim intra octo menses libram semissem pulveris de aconiti extracto, & saccharo, eo quidem effectu, ut topi lapidei quoque ad dimidium diminuti fuerint.

*Mergentheimii* solertissimus medicus , ac phycus , & pharmacopœus efficaciam extracti cicutæ , & aconiti infinitis laudibus extulerunt , & multis atque dignissimis curationum historiis confirmaverunt.

*Kreilsheimii* tradiderunt mihi sequentes morborum curationes expertissimus medicus *Hezel* , & diligentissimus chirurgus *Vogel* , qui ambo Halæ Suevorum degunt.

Fœmina , 52 annorum , ante aliquot annos afficiebatur vehementissimo capitis dolore , qui per aliquot menses duravit ; tunc autem cessavit , & facies tota enormiter intumuit.

Hicce tumor in labium oris inferius contrahebatur , & ibi magnum ardorem pruritumque excitavit.



Applicabantur varia remedia, hæc autem effectu carebant, & tumor sensim mutabatur in verum scirrhum, qui continuo remediorum usu in ulcus cancrosum, inæquale, tuberosum, & admodum foetidum degeneravit.

Hoc in statu dedi mane octo grana extracti cicutæ, & totidem vesperi, externe applicui decoctum cicutæ cum aqua calcis vivæ, & paucis saccharo saturni.

Intra quatuordecim dies jam omnia erant in melius mutata, & ægra erat plena gaudio, & lætitia.

Dedi tunc duplam extracti dosim, externis continuavi, & intra paucas septimanas foedissimum hoc malum perfecte curavi.

Homo, 25 annorum, per aliquot annos castra sequebatur, & subito præter causam sibi notam coepit vera amaurosi in oculo dextro laborare.

Adhibebantur ilico efficacissima remedia, verum visus mansit deletus.

Post aliquot septimanas pes inflammabatur & intumuit, & accessit febris vehemens cum magna siti.

Applicata quamvis fuissent debita remedia, tumor tamen rumpebatur, & abiit in ulcus malignum, trahebatur morbus, & supervenit cachexia.

Æger pessimo in hoc statu mihi commendabatur.

Dedi statim quotidie grana xvi extracti cicutæ, & vulnus decocto cicutæ, & aqua calcis vivæ deligavi.

Post

Post octiduum dedi grana xx extracti per diem, & oculo amaurosi laboranti applicui vapores decocti cicutæ.

Intra paucas septimanas omnia mutabantur in melius, & æger sensit fugitivos lucis radios, nil tamen adhuc potuit distinguere.

Auxi posthac dosim extracti cicutæ, & dedi grana xx mane, & totidem vespere, reliquis externis remediis continuatum est.

Tantum hæc cura habuit successum, ut spatio binorum mensium non solum ulcus pessimum & fistulosum fuerit integre sanatum, sed & rediit visus ita, ut æger potuerit omnia objecta optime distinguere, & videre.



Mirabantur omnes tantum remedii effectum, qui ægrum in miserrimo statu antea viderunt.

Virgini, 12 annorum, ante 4 annos incipiebant parotides dextræ tumere, & indurescere.

Medicamenta statim adhibita sunt interna & externa, verum tumores increverunt semper.

Audebat tunc chirurgus applicare remedia caustica corrosiva, ut hac methodo tumores consumeret, successus autem erat malus; orta sunt ulcera pessima, excrevit caro fungosa, & exstillavit ichor foetidissimus, & cum talia remedia adhuc continuarentur, fiebat verum carcinoma.

Miseriis tandem coacti parentes meæ curæ commiserunt filiam. Situs tumorum

rum non admisit extirpationem, unde denuo ad extractum cicutæ confugi, & cum ægra pilulas non potuit deglutire, miscui extractum cicutæ cum syrups, & hac ratione cochleatim exhibui præter decoctum radicis althææ, scrophular. liquirit. &c. ad ulcera applicui mel rosarum cum pulvere cicutæ, & superimpofui emplastrum de cicuta.

Intra paucos menses non tantum ulcera consolidata sunt, sed etiam tumores sunt integre dissipati.

Fateor, quod hæc curatio mihi magnum gaudium attulerit, feceritque animum in omni data occasione cicutam tentandi.

Virgo, 26 annorum, jam a sex annis scirrhum ovo anserino majorem sub axilla dextra habuit.

Tan-

Tandem me consuluit, & dedi statim purgans, & postea pilulas de cicuta.

Post quatuor septimanas erat tumor mollior, mobilior, & incipiebat dolere.

Auxi dein extracti cicutæ dosim, & incipiebat tumor sub axilla minui, verum glandulæ submaxillares ejusdem lateris intumuerunt, & duræ factæ sunt; & quo minor fiebat scirrhus sub axilla, eo magis increverunt hæ glandulæ.

Auxi dein iterum extracti dosim, & dedi mane grana xx, & totidem vesperti, externe applicui emplastrum de cicuta, & de ranis cum mercurio.

Hac ratione redigebatur tumor sub axilla ad ovi columbini magnitudinem, submaxillares autem glandulæ manserunt in eodem statu.



Vetula , 72 annorum , pessimo cancro exulcerato laborat in mamma sinistra.

Exhibemus ei pilulas de cicuta , ulcus deligamus decocto cicutæ , vel etiam melle rosarum cum pulvere de cicuta.

Minuitur jam durities , & integra frustra ex ulcere decidunt , pessimi ichoris loco adest pus bonum , & signa omnia adeo sunt bona , ut non obstante summa ægrotantis ætate nobis de integra curatione adulemur.

Celeberrimus *Strack* , qui Moguntia tanta cum laude , & felicitate praxim exercet , & professorio munere fungitur , sequentia humanissimis epistolis ad me scribit :

Puer

Puer triennis testiculum cancrosum habuit ; qui ovum gallinæ crassitie fere æquabat , atque extra ulceratum scrotum processit.

Erat iste cancer apertus , fuscus , exulceratus , qui & faniei multum stillavit , & protinus sanguinem , siquidem is tactus est , reddidit.

Voluit chirurgus vitiatum testiculum præscindere ; potissimum cum aliquod spatium in funiculo spermatico adhuc integrum patuit. Illud vero pueri mater maxime impedivit , quoniam id crudele putaverat , flevitque , ut alio quopiam auxilio succurrerem.

Quare ægri alvum purgavi , postea diætam imperavi , deinde vitiatas partes tinctis in cicutæ decocto linteis circumdari foverique jussi : & cicutæ pilulas  
me

medicinæ dedi, quarum octo mane totidemque vesperi quotidie assumeret.

His factum in ulcere bonum pus est, novæque carnes veluti ex recenti vulnere provenerunt: finitoque tertio curæ mense puer ex toto convaluit: ejusdem testiculus sano similis intra scrotum, quod cicatrice clausum est, rursus conditur.

Puella triennis ex vitiato corporis habitu contabuit: noctu infudavit, & pulsum exilem habuit, & juxta unius manus ossa metacarpi atque secundum utrumque pedem tophos, infraque sinistram alam ad musculum pectoralem usque, grandem perdurumque scirrhum habuit: itemque ad os, in qua parte labia committuntur, ulceratum lichenen, quem hæreditaria labæ accepisse ægram verisimile est, præ-

ter



ter hæc universa corporis cutis colorem, decoremque amisit.

Quæcunque vero medicamenta aliquamdiu adhibita fuerunt, nequaquam profuerunt.

Quare inspissatum recentis cicutæ succum ægræ præstiti, ejusdemque mane atque vesperi pilulas octo exhibui; incipiendo a duabus donec, ad octo ascendifsem.

Præterea ipsos tophos, durum sub alatum tumorem, unguento mercuriali sæpe inungi jussi.

His sudor desiit, exsiccatus lichen, subjectaque cūtis mollis depurata est; factusque bonus, firmus, laetusque omnino corporis habitus, summaque mentis hilaritas. Universa corporis cutis alba, clara, subroseaque evenit, minor mobilisque

que factus sub axilla scirrhus est, idemque veluti in distinctas portiones secedit. Ipsi vero topi iidem permanferunt.

Jam per integrum fere annum puella ita bene habet, ipfasque cicuta pilulas continenter hucusque affumfit. Nihilominus neque topi neque scirrhus magis, quam ante octo menses fuerant, imminuti funt.

Ne quis vero exiftimet, aliquantum quidem ex ifta curatione fuffeffiffe, quoniam cum fucco cicuta unguentum mercuriale fimul adhibitum erat, nunc alia curationum exempla fubjungam, quas fola cicuta perfecit.

Vir, 50 annorum, bibulus, turpem latumque lichenem juxta nafum fecundum barbam aliquamdiu habuit. Ab eodem vero liber exiftit, poftquam eundem tin-

etis in cicutæ decocto linteis fovisset; ipsius cicutæ inspissati succi drachmam quotidie assumsisset.

Cæterum duos adhuc infantes curandos habeo; quos vitii corporis humores male habent, & qui jam aliquam ex cicutæ usu curationis spem ostendunt.

Vir, 30 annos natus, extremas duorum digitorum, & unius pollicis partes cancro exulceratas aliquamdiu habuit. In his enim carnes prætumidæ, dolentes, exulceratæ foedæque erant, & tenuem faniem, & sæpe sanguinem stillarunt, neque ullam curationem aliquamdiu admiserunt.

Posteaquam æger succi inspissati cicutæ drachmam quotidie assumsisset, ipsosque digitos tinctis in aquam, in qua cicutæ cocta prius erat, linteis circumdedit, post duos menses ex integro convaleuit,



valuit, neque ullum deinde digitorum vitium remansit.

In alia epistola ad me data 8. Decemb. 1764 idem doctissimus vir hæc habet:

De quibus ægris anno 1762 dixi, ii omnes ex toto sani integrique hucusque permanferunt: neque ulli horum ex cicuta aut noxa relicta est, aut novum aliquod vitium supervenit.

Hos inter puella illa triennis, de qua eo tempore memoravi, hic iterum, & qua ratione interea valuerit, notatu digna est.

Assumfit enim hæc hucusque pilulas cicutæ quotidie viginti; easdemque assumere continuat, exque his durus glandularum scirrhus, qui infra finistram alam juxtaque musculum pectoralem erat, ex toto evanuit. Ossium item metatarfi metacarpique topi: alii per se defierunt,

illæsa cute; alii, qui ulcerati erant, nunc perfanati, bonaque cicatrice clausi sunt; neque ex his, nisi unus, levi ulcere adhuc patet.

Quod proxime finem habiturum est. Rejecto jam ante duos annos unguento mercuriali; quoniam nullus ex eo profectus erat, etiam serpigo juxta auriculam, ulcerosus nasis, & oris labiorum tumor, ipsaque in capillitio tinea (quæ vitia interea temporis supervenerant) omnino, & sine adhibito alio quopiam auxilio defierunt. Insuper ista puella staturam decoram, coloratam cutim, corpus pinguiusculum, mentem hilarem, acutumque ingenium accepit.

Quantum hic casus pro cicutæ utilitate pugnat! quantum probat, hoc reme-

remedium usu diutissime protracto nullam adferre noxam!

Nunc ad nova curationum experimenta quæ hucusque successerunt, pervenio.

Juvenis, octodecim annorum, strumam ex prætumida glandula thyroidæa habuit, exque ea respirationem difficilem, & cum sonitu; atque ubi corpus motu aliquanto vehementius excitavit, quasi strangulatum iri se habuit.

At posteaquam is tribus continuo mensibus extracti cicutæ drachmam quotidie assumisset, discussa omnis struma est, secutaque spirandi libertas.

Eodem vitio, & magis inveterato, laborabat juvenis 20 annos natus; obque id spiritum difficulter duxit cum sibilo. Adhibito vero per quatuor menses eodem auxilio, integre convaleuit.



Rursum juvenis, 22 annorum, sensim videndi facultatem magis atque magis amisit, sic ut metueret, se denique omnino cœcum ita futurum esse; ob quæ merogavit, quid auxilii adhibendum esset? erant vero oculi sanorum similes, neque ullum in his vitium deprehendere potui.

Quare juvenem collum denudare jussi, visurus num aliquod vitium venas jugulares afficeret, inque his sanguinis redditum impediret? apparuit tum lata struma, quæ aliquam jugularium venarum portionem amplexa infarctum sanguinis in capite effecit, exque eo cœcitatem.

Retulit etiam juvenis, ubi montem aut scanderet, aut corpus quovis modo velocius agitare, difficulter spirare se atque angi.

At

At posteaquam extracti cicutæ drachmam quotidie in quintum usque mensem assumsisset, dissipata struma est, & spiritus liber evenit, & acutus visus.

Aliorum strumas cicuta ex parte, aliorum nequaquam tulit.

Amaurosim vero, quæ orta ex alia causa erat, extracto cicutæ per integrum anni spatium frustra curavi.

Porro cicuta ulcera antiqua, si non sanat, purificat. Sanavit autem plura.

Miles, 30 annorum, ab octo jam annis ulcera magna, profunda, fordida, & quæ foedam faniem destillarunt, juxta tibias habuit, tumidosque ipsos pedes, hæc & quousque tumidi pedes erant tinctis in aqua, cui incocta cicuta prius erat, linteis foveri, noctu vero linteo carpto cum balsamo arcei impleri jussi, & ægro

extracti cicutæ drachmam quotidie præstiti. Potui dedi multam aquam, adjecta aliqua portione vini; diætam præcepi & quietem, intereaque alvum aliquoties pharmaco subduxi.

His depurata ulcera sunt, novæque ex his carnes veluti ex recenti vulnere provenerunt. Secutum est largum urinæ profluvium, quod tumorem pedum subtraxit. Accefferunt ex omni parte carnes cutisque, ulceraque post quartum mensem bona firmaque cicatrice clausa sunt.

Vir, 48 annorum, ex antiquo intra thoracem apostemate male habuit, eoque rupto quam plurimum foedi pessimeque olentis puris sputo rejecit. Huic diætam præcepi, medicamentaque acida, quæ & sputum moverent, & putredini resisterent, præstiti; potui dedi coctas in  
aqua



aqua herbas molles adjecto oxymelle scil-  
litico, cumque ex his meliora sputa e-  
venissent, & febris desiisset, lac vac-  
cinum exhibui, & pilulas ex corticis pe-  
ruviani pulvere cum extracto cicutæ ad-  
mixta terebinthinæ portione.

Hæc sputum & melius effecerunt, &  
idem emolliverunt, & purgato ulcere  
cicatricem induxerunt, indeque id, quod  
læsum erat, integrum evenit, reversaque  
prospera valetudo est.

Vir, 40 annos natus, propter apo-  
stema, quod intra sinistram pulmonis par-  
tem habuit, vitiati corporis habitus erat,  
& febricula, quæ vesperi exarsit, labo-  
rabat & noctu infudavit, & pedes tumi-  
dos habuit aqua inter cutem; & noctes  
inquietas egit, & cibos nauseavit, & cir-  
cum præcordia angebatur, & sublimem

spiritum traxit, & rupto dein apostemate quam plurimum puris ejecit; huic aquam, in qua decoctæ molles herbæ erant, calide forbendam dedi, adjecto nitro, & oxymelle scillitico. Præterea mixturam præstiti, cui & nitrum & oxymel squilliticum & gummi amoniacum aceto squillitico solutum admista erant.

Quæ quamplurimum puris longoque tempore continenter emolliverunt, cumque quæ deinde exierunt, sputa alba, densa atque tenacia evenissent, priora remedia dimisi; pro his cicutæ pilulas substitui, & harum drachmam quotidie præstiti, potui vero dedi corticis peruviani drachmam in aqua coctam, adjecta æqua lactis vaccini portione.

His depuratum ex toto ulcus, cicatriceque clausum, ex integro perfanatum est,  
æger-

ægerque bene convaluit, multumque jam peregrinatus est, prospera usus valetudine.

Atque ne quis fortassis existimet, successisse istas quidem curationes propter adhibita reliqua auxilia, neque cicutam aliquid ad valetudinem attulisse; nunc similem curationem proponam, quam sola cicutâ perfecit.

Puella, 18 annos nata, a duobus ultro annis fœdo pulmonum ulcere laborabat; adversus quod multa, & diversa auxilia etiam maxime commendata adhibuit. Assumfit etiam per tempus aliquod aquas minerales felteranas admisto lacte: denique diæta lactea utens nil nisi lac vaccinum & bibit, & cum incocto modo pane, modo hordeo, modo oriza cibo

ha-



habuit; verum ista omnia nequaquam profuerunt.

Quare in desperata hac morbi conditione solum extractum cicutæ, rejectis cæteris omnibus pharmacis, ægræ medicinæ dedi.

Inde sputa & facile prodierunt, & pus bonum evenit, & quotidie minus succrevit, & quo magis tempore progressum est, eo puris minus, atque minus excretum est, tandemque ulcus finito quarto mense, ex toto sanatum est, puellaque nunc a sex jam mensibus prospere valet.

Denique quod extractum cicutæ magnum etiam venereum bubonem foedaque in pene ulcera, quæ mercurialibus auxiliis pertinaciter restiterunt, facile superaverit, excitatoque in his, & bono,

&

---

OBSERVATA AB EXTERIS &c. 189

---

& paucissimo pure brevi perfanaverit, ab Illustri Principis nostri Electoris Archiatro *Jacobo Naubeimer*, qui istum ægrum curaverat, relatum accepi.

In cutis etiam vitiis cicuta, ut supra memoravi, præsidio erat.

Virgo 25 annos nata, duos latos lichenes supra malam finistram ab inferiori oculi palpebra ad oris labia usque aliquandiu habuit, quos diversis remediis frustra agitaverant.

Erant isti lichenes foedi, in quibus exulcerata erosaque cutis ad paniculum adiposum usque est, posteaquam vero ægra tinctis in cicutæ decocto linteis istos lichenes continenter fovisset, quotidie succi inspissati cicutæ drachmam assumsisset, post duos menses convaluit,

tur-

turpis istius vitii expers, prioremque cutis venustatem, relicta tantum, quemadmodum a variolis, levi aliqua fovea, recepit, retinuitque hucusque, ubi tertius nunc agitur annus.

Puella, 18 annos nata, difficili ferpigne supra manus finistræ dorsum, juxtaque digitos male habuit; cujus neque causam tollere, neque progressum sistere potuit medicus perexpertus; invitis omnibus per annum integrum remediis.

Quare ægræ alvum prius pharmaco purgavi, deindeque læsam manum tinctis in cicutæ decocto linteis foveri jussi; medicinæ vero dedi extracti cicutæ drachmam quotidie.

His intra quatuor menses depurata cutis est, prioremque colorem decoremque



que recepit, retinuitque per duos fere annos, at nunc idem malum recrudit.

Præter hæc ista puella & tardum & difficilem, & perpaucum fluxum sanguinis menstruum olim habuit, a quo vero tempore cicuta usa est, eundem sanguinis fluxum & facilem & largum, & ordinatum, quandoque etiam superfluum accepit, & nunc habet.

Quare quoniam iste quidem cicutæ effectus singularis mihi videbatur, etiam aliis puellis, quæ difficulter menstruatae sunt, neque quam ob causam ita essent, cognoscere poteram, cicutam medicinæ dedi, quæ sæpe etiam juvit, & istum sanguinis fluxum perfecit.

Diligentissimus, ac expertissimus Josephus Polzer, Schönbergæ in Moravia physicus, hæc notat.

Vir,

Vir, 46 annorum, ex inordinato vitæ genere maxime hauſtu ſpirituoso incidit in obſtructiones ſcirrhoſas infimi ventris, qui non ſolum inſtar tympani monſtroſe tenſus, & reſonans, ſed & lapidis inſtar durus erat, & reſpirationem poſt paulo fortioſorem motum impedivit, ſomnum inquietum reddidit, omnemque appetitum deleſcit.

Fruſtra ab aliis adhibitis variis medicamentis, uſu pil. de cicuta, interpoſitis laxantibus, ex rhabarb. cum ſale polychreſto, & emplaſtro de cicuta ſpatio 3 menſium cum omnium admiratione curatus eſt.

Vir, 56 annorum, tuberculum in naſo per aliquot annos geſſit, quod lympham acrem plorando vicinas partes eroſit, ulterius verſus oculum finiftrum ſerp-

serpsit, malignæ erat indolis, & fœdum  
ulcus formavit.

Adhibitis pilulis de cicuta, & ex-  
terne solo applicato infuso cum linteis  
carptis, brevi pus coctum apparuit, &  
post aliquot menses sine omni difformi-  
tate malum totum ablatum est, jam per  
biennium vulnus clausum perseverat.

Vir, septuagenario major, podagri-  
cus, ultra 10 annos tuberculum exiguum  
versus nasum, & oculum finistrum, sine  
magno incommodo, habuit, subinde lym-  
pham acrem stillavit, subinde crusta  
tectum, consolidatum videbatur. Hujus  
rei pertæsus, & ab imperitis persuasus,  
varia interna & externa applicuit.

Cura salivationis totus emaciatus &  
cachecticus factus, eo cum effectu, ut  
ulcus vere cancrosum nasum & oculum



occupaverit, quem fere totum cum foetore exesit.

Adhibitis per septem menses, pilulis de cicuta & fomentis rediit color faciei roseus, vividus, mentis alacritas, omnesque corporis vires.

Paroxysmus podagricus hucusque filuit, & vulnus ita emendatum est, ut jam limites cancro positi sint, si usum continuaverit, spero eum ex integro restituum.

Vir, 40 aliquot annorum, in hypochondrio sinistro, ultra annum, tumorem vere scirrhum, lapidis instar durum, cum ingenti extensione tympanitica totius abdominis habuit.

Adhibitis multis, & variis medicamentis sine omni effectu, usu pil. de cicuta emplastro eodem, interpositis laxantibus,

tibus, spatio duorum mensium integerrime restitutus est.

Fœmina, 48 annorum, ex solo defectu mensium se putans gravidam, donec decimo mense accesserit hydrops, & plures observarentur tumores diversæ magnitudinis in abdomine, præsertim unus vere scirrhusus, pugno virili major, qui circa ovarium sinistrum hærebat.

Adhibitis pilulis de cicuta, & interpositis purgantibus, nec non dato pulvere de extracto aconiti, & saccharo, qui in defectu pilularum de cicuta substituebatur, successive omnes tumores resoluti sunt, spatio novem mensium, & disparuit hydrops. Citius hæc curatio successisset, sed propter distantiam loci aliquoties interrompebatur.

Fluxus menstruus debito tempore & ordine sub ipsa adhuc cura comparuit, & hucusque in annum secundum debito modo perdurat.

Bene appetit, digerit, & functiones naturales peragit, hæc fœmina ab omnibus pro perdita jam habita est.

Fœmina, 40 aliquot annorum, a longo tempore variis symptomatibus hystericeis, & fluore albo uterino cum tumore scirrhuso circa ovarium finistrum, pugni virilis instar, vexata est.

Adhibito pulvere de extracto aconiti cum saccharo, & infuso cicutæ, cui addebatur quarta pars lactis, & appposito emplastro de cicuta post sex septimanas integerrime curata est.

Puella, 9 annorum, foedissimis pustulis mediam faciem inferiorem occupantibus,



---

OBSERVATA AB EXTERIS &c. 197

---

tibus, præsertim naſum internum, & externum, nec non labia oris, cum dolorifica tenſione, duritie, & inflammatione patiebatur plurimum, & ita erat turpis, ut omnes conſortium ejus fugerint, putantes a malo venereo originem trahere.

Hæc ſpatio aliquot ſeptimanarum, ſolo uſu pil. de cicuta, & fomento, & lotu ex cicuta parato ex integro curata eſt.

Virgo, 19 annorum, a nativitate ſemper valetudinaria mox glandulas colli, mox parotides, mox ſubaxillares geſſit tumidas & induratas.

Tota triſtis, moroſa & melancholica. Accedente fluxu menſtruo inordinato, ſubinde media facies cum oculo dextro inflammabatur, ſubinde uterque oculus af-

ficiebatur ita , ut de visu recuperando sæpe dubitaretur.

Nasus turpissimis pustulis interne , & externe obsidebatur ; sensim etiam in manibus , & pedibus circa articulos , nec non infimo ventre tumores scirrhusi observabantur ; in facie , & collo hi tumores tandem exulcerati sunt , & nil nisi acrem ichorem fuderunt.

In tali rerum facie consilium ægra a me petiit.

Ordinavi pulverem de extracto aciniti & saccharo cum fero lactis , his usa est ultra medium annum sine effectu.

Suasi dein , ut illa extractum de cicuta fumeret cum infuso florum sambuci , quibus in quintum mensem eo cum effectu utitur , ut tumores omnes resoluti sint , ulcera consolidata , excepto unico , quod

nunc

nunc etiam ad consolidationem vergit, ita, ut spes sit integerrimæ restitutionis.

Menstrua nunc ordinate fluunt. Totus corporis habitus emendatus est, color faciei vividus, tota hilaris, jucunda & læta est.

In doloribus arthriticis, & rheumaticis etiam chronicis ab aconito, & cicuta ut plurimum optatum inveni effectum.

Eruditissimus Petrus *Poltzer* copiarum tormentariarum Medicus, cui multas gratias debeo, cum mihi plurimum adstiterit, curamque mei gesserit in morbo, quo Francofurti decubui, hæc scribit.

Vidua, 36. annorum, cum Decemb. mense anni 1762. ex vico mecum in urbem reverteretur, post familiares sermones me consuluit, atque a multis retro annis se in mamma sinistra tumorem par-



vum, sed durum gestasse narrat, qui ab aliquo tempore non mole modo auctus, sed & dolorificus factus est. Dispiciens locum vidi futuri proxime exulcerati cancri limites; suadenti cicutam in pilulis morem non gessit; ego vero iter plus 20 milliarium facere jussus non nisi post medii mensis spatium in eam urbem redivi; vix meum adventum percepit, cum me rogaret, ut eam inviserem, detegens cancrofam in inferiori parte mammæ sinistræ prominentiam, ad quatuor digitos dependentem ultra mammæ limites, & superius tres fere digitos crassam, ad coni formam se extenuantem, foetidissimum tunc odorem sparsit, consului cum chirurgis, quomodo auferenda esset hæc massa; plurimum votum, ut cultro auferatur, respuens ægra inane fecit,

cit, sed filo tumorem successive arctanti locum concessit; intelligens tunc, quod pilulas respuat, exhibui cicutam forma mixturæ, & prominentiam foedissimam cicutæ fomento involvi jussi, filum tumori circumpositum indies arctabatur, & decem dierum spatio tumoris pars filo intercepta cecidit, post aliquot dies foetor quoque mitigabatur, & quies, quæ prolium, & ægræ luctu, atque vitæ desperatione tota fuit ablata, redivit cum auctis non nihil viribus, indies fomento atque interne sumpta mixtura, & interpositis quibusque decem diebus leni laxante spes reconvalescentiæ crevit, cum symptomatum diminutione, ita, ut commodè jam muniis domesticis præesset; verum magnam tumoris partem, quæ filo capi atque auferri non potuit, nec

cute tegi, nec cicatrice obduci, egregius chirurgus lapide infernali tentandam rogavit, ast suasi fomentationem continuandam, nolens irritante acri tangere locum, interim vix videbatur diminui aliquamdiu, etsi pus multis locis fat bonum prodiret, igitur incio me, ægræ precibus permotus id fecit; quamvis autem noxæ nihil accidisse viderim, tamen ad vota non promovit consolidationem, sed suppuratione successiva, & subinde ferofi liquidi profluentis rivo partes cancrofæ ita separatæ sunt, ut ulcus purum ad crucigeri latitudinem apertum, cum locum eum relinquerem, esset idque perfanandum perito in vicinia chirurgo traderem, qui paucos post menses fanatam ægram mihi retulit.



Alia fœmina, 30 circiter annorum, sanguinea post puerperium absolutum, nec octo diebus ab aëre libero se continuit, verum iter 18 miliarium suscepit, in eo incidit in dolorem mammæ, qui utcunque perfanatus est, verum sensit intra mammam ad costas aliquem duriusculum tumorem, qui quam plurimis tentatus, nulli cessit remedio, e contra augebatur semper a mamma dextra media circiter versus finistram, & sub ea anno 1763 serpebat versus axillam finistram, sed inferiori loco; vere adveniente ultro serpere nec non ultro dolorificus esse tumor cœpit; me consulenti mox proposui usum cicutæ forma pilularum, quem assiduo quidem continuavit, verum alios etiam hinc inde medicos, & chirurgos consuluit,

me-

metuens futurum cancrum. Accepit idem a pluribus consilium, proinde usum remedii tanto alacrius continuavit, tandem sensit duritiem tumoris mollescere & fluctuationem. Noctu circiter ad decimam Julii pustula formata est, & dehinc effluxit insignis materiæ, & saniei copia; territa phænomeno eum in locum venit, quem habitabam, ut continuo adessem. Inquirens rei statum vidi ex duro tumore natum abscessum, materiamque fluctuare, a dextra mamma, quantum experiri licuit, atque in sinistram, descendendo transversim sternum, prout olim tumor decurrebat; cataplasmata emollientia cum juncta cicuta sedulo per diem applicuit, noctu vero ejus emplastrum apposuit; altera die anxia pronunciavit se esse gravidam,

rogavitque, num hæc remedia forte foetui nocerent, quod cum negarem, omnia, quæ ex arte accidere deberent, patienter se laturam promisit, & quoniam pus fere fluctuans percepimus, incisio facta fuit ad locum, in quo nuper sponte sua ichor purulentus exivit, sed cum hæc altior esset, altera fiebat loco, quo fieri potuit infimo, tum ingens quantitas materiæ prodivit una cum ichore, sed non adeo foetido; ex cicutæ decocto & ejusdem extracto in eo soluto, & melle quotidie fuit facta injectio, interne sedulo continuavit in usu pilularum, atque his minus quam duorum mensium spatio integram sanitatem recepit, & justo tempore vegetam filiam peperit, quæ etiamnum perpeffos matris dolores lenit.

Alia



Alia vidua, 56 annorum circiter, mi-  
fero manuum opere multasque inter fa-  
miliæ æumnas dextram mammam longo  
tempore duram gessit, cumque rubere  
inciperet magis, & dolore, consultus  
suasi usum cicutæ internum, externum-  
que, verum ob egestatem forte diu non  
continuavit, nam eum in locum tunc  
raro perveniebam. Postero anno ob  
dolores diu noctuque molestissimos cum  
se mihi rursus videndam præberet, con-  
spexi in macilenta anu foedissimum mam-  
mæ cancerum in dextro latere. Chirur-  
gum tunc nostrarum copiarum, qui eo  
loco morabatur, rogavi, ut sedulam  
ejus curam gereret, usu cicutæ omnia  
videbantur emendari, subinde fluxus  
ichorosos sanguine mixtos passa spem  
curæ fecit, ast tandem infomnes noctes,  
&

& dolorosas cum spiritus vini haustu vellet habere quietiores, obiit misera, dum jam multam remedii efficaciam antea comprobasset. In tumoribus, qui colli & maxillæ inferioris glandulas obfident, apud pueros, & juvenes vix unquam me fefellisse, memini usum cicutæ, quin etiam vermes quandoque plurimos exterminatos vidi, & ulcerum chronicorum, & tineæ capitis, quorum alias consolidatio difficilis, & suspecta habebatur, pulcherrime perfanata lætus recordor.

Doctissimus Thaddæus *Bajer* Medicus castrensis hæc habet:

Herbam cicutæ recentem cum integro succo confcisam æquali mellis quantitate citra omnem coctionem reduci jussi

in

in conservam, gustanti inde pauculum nil insoliti accidit.

Quare statui conservæ hujus usum me facturum in quinque ægris, duobus toto fere corpore ulcerosis, tribus fœdis pedum ulceribus afflictis, quos nosocomium militare tunc mihi exhibuit.

Seposito itaque omni alio tam interno, quam externo remedio, conservæ drachmam dimidiam bis de die, cum demum nihil insoliti illis accidere viderem, integram drachmam pro dosi bis de die, tum demum ter de die deglutendam propinavi.

Interim ulcera decocto cicutæ, recentis lavari jussi.

In primis protinus diebus ulcera bonum dare pus, tum ficcari, consolidari:

citra



citra spem paucō tempore sunt omnes sanati.

Doctissimus *Haan*: cicuta perfecte curavi narium cancrum, & scirrhū ventriculi delevi, & caret nunc ægra vomitu, qui prius erat frequentissimus. In aliis quoque indurationibus cicutam exhibui, quibusdam opem attulit, aliis malum intactum reliquit.

Aconito hominem curavi, qui arthritide scorbutica laboravit tribus annis, & pes unus erat rigidus.

Plura tibi narrarem de cicutæ usu, verum hoc medicamentum adeo apud nos inique est proclamatum, ut non nisi furtim illud applicari possit.

Dominus *Hart* expertus, & diligens chirurgus:

Famulo, quartana febre diu laboranti, glandulæ submaxillares dextræ intumuerunt, & scirrhusæ factæ sunt, tumor erat pugno virili major, & æque durus, ac lapis, seque extendit usque post aurem ejusdem lateris.

Plurima tentata remedia nil juverunt, & febris toties suppressa iterum recru-duit.

Ufu autem interno externoque cicutæ tumor magnus in plura minora tubercula ab initio dividebatur, dein in suppurationem spatio duodecim dierum abiit. Facta apertura ultra libram boni puris effluxit.

Vulnus remedio digestivo deligavi, & in saccum feci injectiones ex decocto cicutæ, ejus extracto, & melle rosarum,

---

OBSERVATA AB EXTERIS &c. 211

---

rum, interno usu cicutæ continuatum fuit.

His spatio quatuor septimanarum æger integre sanatus fuit, & a febre, quæ aliis remediis non obedivit, perfecte liberatus, ita, ut nunc bonum habeat colorem (alias erat cachecticus) & vires adeo magnas, ut officio suo stabulario optime fungatur.

Magnificus Dominus *Humelauer* toti huic curæ adstitit, eamque exacte observavit.

Doctissimus ac solertissimus Dominus *Marckmüller* physicus Cæsareo-Regius in Laxemburg.

Filia hortulani, 16 annos nata, dum ab omnibus ob parvitatem staturæ pro septenni habebatur, a prima ætate abdomen lapidis instar durum gerebat.



Dederunt ideo sæpius purgantia fortia, quibus corpus extenuatum, & magna cachexia inducta est. Pater me consult; dedi cicutam, jubens, ut vellet ægra per aliquot menses continuare.

Brevi melius se habuit, & appetitus, qui a primo cicutæ usu multum infurgebat, mansit semper bonus, durities abdominis emolliebatur, & tertio mense color cachecticus faciei mutabatur in vividum.

Plus intra tres menses corpore increvit, quam antea per tres annos.

Sartor, post febrem intermittentem sicca tussi, nocturno sudore, œdemate pedum, & tumido abdomine laborans usu cicutæ intra bimestre spatium liberatus est, omni ex parte modo sanus.

Faber ferrarius lue venerea ita laboravit, ut a vertice ad calcem usque unum quasi condyloma fuerit, ab omnibus civibus, ut peste infectus fugiebatur, lecto dein affixus, ejulatu domum & viciniam implevit, mercurialia & ab aliis & a me data sunt, sed sine effectu. His substitui solam cicutam, mirum! post octiduum omni dolorum cruciatu liber, & post mensem curatis condylomatibus templum ingressus omnibus miraculo fuit.

Juvenis, 19 annorum, neglecta, & pessima gonorrhœa laboravit, cicuta intra 14 dies curabatur.

Alius gonorrhœa laborans, & testiculo venereo & condylomatibus, datis cicutæ unciis duabus brevi sanatus est.

Mulier, & gonorrhœa & condylomatibus affecta, quæ non solum in pudendis, sed facie & reliquo corpore comparebant, sesqui mensis spatio eodem cicutæ extracto restituta est.

Filiolus hortulani, septennis, ab incontinentia urinæ & tumido abdomine drachmis duabus cicutæ liberatus est.

Tres alii infantes tumido abdomine partim ex febre intermittente, partim ex esu nimio atri panis affecti, brevi, & pauca quantitate cicutæ sanati sunt.

Hortulanus, arthritide, & ischiatico malo diu vexabatur. Cicutæ primum vaga arthritis, dein & ischiaticus dolor cessit.

Hujus viri urinæ per duos menses & ultra, quotidie copiosissimum materiæ



riæ mucosæ, glutinosæ sedimentum gerebant.

Filia molitoris, a pluribus annis pessimo ulcere, & fistula profunda ad femur dextrum laboravit. Parentes de cura filiaë desperabant, cum jam peritissimi medici innumera incassum tentassent. Dedi cicutæ extractum, & intra mensem solo interno usu optime ulcus claudabatur, & fistula, & tres menses sunt, a quibus clauso ulcere optime sana est.

Ancilla, 54 annorum, hydrope pectoris, & cachexia laborans, servitio præesse non potuit. Data cicuta omnia hæc mala lente quidem ita emendata sunt, ut sua domestica obire nunc perfecte valeat, & quamvis jam sana sibi videatur, jubeo tamen, ut per aliquod tempus usui pilularum insistat.

Famulæ subito oriebantur sub mamma dextra innumeræ vesiculæ, acrichore flavo multum elevatae, magnitudine pisi, quæ ad vertebrae dorsii instar zonæ tres digitos latæ se extendebant. Hæ vesiculæ tam acerbe dolebant, ut febre prehenderetur, deliraret, & violentam sibi manum præ intolerabili dolore vellet inferre. Facta venæsectione exhibeo decoctum hordei mellitum, & mixturam cum extracto cicutæ, & externe applicui cataplasma ex floribus sambuci & herba cicutæ, cum aqua & lacte paratum, ruptis vesiculis disparuit febris, & dolor; sequebatur bona suppuratio, & cutis brevi pulchra cicatrice claudebatur.

Fœminæ in puerperio ex aëre frigido imprudenter admissa mamma dex-

tra

tra tumet , quæ imposito emplastro de galbano , & spermate ceti rumpitur , magna copia boni puris exit , reliqua autem pars mammæ durissima manet , imposito licet emollientissimo cataplasmate , quin apertura sponte coaluit , manente in superiore parte summa duritie. Emplastro de cicuta applicato , & data uncia extracti cicutæ intra sex septimanas omnis durities fusa est , & mamma naturalem mollitiem recuperavit.

Rusticus media hyeme anasarca laboravit. Hunc usu cicutæ brevi curavi. Dedi quotidie grana viginti extracti cicutæ , & prodiit urina copiosissima.

Vetula gravi peripneumonia prehenditur. Toto morbi tempore nihil materiæ morbosæ evacuatum est , licet optima expectorantia emollientibus jun-



xerim. Morbus tamen 14 die omnibus curatus, mihi vero recidiva, vel alius morbus timendus, videbatur. 17 die sub vesperras calorem, & sitim augeri summa cum debilitate observatum est, idque per duos insequentes dies. Vocatus dein & ob progressam ætatem, & morbum prægressum prognosin non bonam feci. Animus erat tentandi, quid cicuta faceret, qua materies morbosa, a morbo acuto superstes, & in sanguine oberrans, quæ jamiam febrem hæcticam accensum iret, ex sanguine eliminarem. Dedi ergo mane & vespere quinque cicutæ grana, & quinto die invenio lætam feniculam extra lectum, summo appetitu comedentem. Affirmabat mihi, se per biduum circa vesperras nec calere, nec sitire ut ante; meo consilio eandem dosin

dofin per aliquos dies continuavit, & nunc optime fana est.

Civi jam duæ proles variolis ereptæ erant, & nunc puellam nondum annum natam decimo feptimo die morbi variolosi morti proximam videt.

Incipit & alia puella triennis, quæ ultima est, febricitare. Vocor, & hanc variolis laboraturam dico: fuadeo pedum balnea, enemata, præscribo antiphlogistica; tunc narrabat pater, omnes fuas proles decimo, vel undecimo die abſceſſus habuiſſe, quibus conſumptæ interiviffent, ut manifeſte videre erat in altera moribunda; etenim in utraque cubiti articulatione erant cavi finus in ipſam capſam articulareſ penetrantes, tangendo ſtrepitus audiebatur, & materia alba limpida granula offea continebat; qua  
puella

puella etiam brevi extincta fuit. In altera, ad quam vocabar, puella die quarto comparuere variolæ, quinto plures. Dato diacodio pulchre quidem elevabantur, & variolis discretis adnumerari merebantur, sub finem sexti diei nihilominus multæ subsidebant. Puella, quæ hucusque sat bene se habuit, magis ægrotabat; & videbatur imminere periculum.

Tentavi tunc cicutam & dedi primo die tria extracti grana, altero sex, & tertio octo.

Sic omnia mutabantur in melius, puella fiebat alacrior, larga urina fluxit, & morbus finiebatur feliciter.

Dedi dein adhuc per 14 dies quotidie grana decem extracti, nec ullo purgante opus fuit, & etiam macula  
alba,



alba, quæ a variolis in oculo dextro nascebatur, usu cicutæ ablata fuit.

Hanc puellam nuper post tres menses sanissimam & formosam vidi.

Puella, quinque annorum, subito convulsiones patitur, & prodeunt ex ano tres lumbrici. Vocatus dedi cicutam cum melle instar linctus, & excernebantur cum multa alvo sensim sedecim lumbrici.

Et nunc puella bene valet.

Fœminam, 28 annorum, pessimo, & omnibus usitatis remediis resistente hydrope laborantem, oxymelle colchico feliciter restitui.

Puellam, 14 annorum, toto corpore & facie aquoso tumore inflatam & monstrosam, quam quoque alia fortissima remedia non juvabant, eodem oxymelle

melle colchico, & frictionibus aromaticis perſanavi.

Hoc eodem remedio ſcœminam ſexagenariam, quæ peſſimo ventris hydrope jam per plures annos detenta fuit, reſtitui.

Anno elapſo Leopoldſtorffii ſeptem infantes, & hoc anno tres Laxemburgi curavi oxymellis colchici pauca quantitate, omnes absque ullo prægreſſo morbo toto corpore intumuerunt, & erat aqua intra cutem.

ſcœmina ſeptuagenaria apoplectica ſtuporem habuit in utroque brachio, & digiti erant omnes rigidi, &, dum volebat illos movere, dolorem ingentem ſenſit.

Externa internaque remedia per multos menſes applicata nullum levamen

ad-

adtulerunt, tandem datum aconiti extractum cum saccharo digitis, & brachiis liberam mobilitatem restituit, & vetula bene habet.

Vir, 32 annorum, mense Novembri casu aliquo in aqua fluviali ad lumbos usque ultra semihoram manere, simulque pondus currus vino onusti fulcri instar sustinere debuit.

Eodem die domum veniens per vices frigere, & calere coepit. Altero die chirurgum, qui ipsi venam secaret, vocari iussit. Cum sanguis adhuc e vena flueret, toto corpore, excepto capite fiebat immobilis, dolores simul atrocissimos cum perpetuo frigore sentiebat.

Fomentis calidis, siccis frigus moderari, motum membrorum restituere,  
&



& dolores sedare frustra tentabant, imo reddebant eos atrociores.

Sexto die a celebrata venæ sectione vocatus inveni pulsum, respirationem, calorem totius corporis naturalem, mens ægri non erat dejecta, color faciei sanissimus, appetitus vicens, & fitis nulla.

Conquerebatur autem de continuo frigore, & sævissimo dolore totius corporis, solum caput erat liberum, cæterum vix sustinuit præ dolore manum, pulsum explorantis, nec ipse cibum, vel potum sumere valuit, sed omni hora, per substrata lintea, loco moveri debuit.

Præscripsi infusum leniter aromaticum, ut omni hora duo vasculasumeret.

Post

Post biduum loco levaminis dolores erant majores, & tumor durus in omnibus articulis deprehendebatur.

Ordinavi aquæ laxativæ uncias septem, ut omni hora duo cochlearia sumeret, & postea infusum præscriptum continuaret, & quarto die vidi ægrum in eodem statu, licet decies alvum deposuerit.

Substitui validiora diaphoretica sine ullo levamine.

Sexto die vesicatoria, quæ lentorem humorum in membranis tendinosis stagnantium solverent, morte ipsa magis recusavit, dolore aliunde plenus.

Postea per quatuordecim dies mansit sine meo consilio, dum interea muliercularum suasu unguenta, & spiritus,

P

qui-

quibus inungebatur, aliaque magis stimulantia interna adhibebantur.

Denuo vocatus exhibui extractum aconiti cum saccharo, quod tamen, ut omnia medicamenta in forma sicca respuebat.

Hinc eundem pulverem in mixtura exhibui, cujus drachmas duas uni libræ aquæ addidi, & omni quadrihorio duo cochlearia dari jussi, de nocte autem nihil sumfit.

Post quatuor dies loco transpirationis vidi urinam flocculentam in fatis magna quantitate.

Hinc mixtura repetita fuit, omni trihorio vero duo cochlearia assumpta sunt.

Tumor in articulis disparere, & dolor de die tolerabilior fieri cœpit, noctu vero semper exacerbatus est.

Eo-



Eodem remedio continuatum fuit, quo post quatuordecim dies omnis tumor evanuit, dolor multum remisit, & æger cibum, potumque, qui prius per custodes dari debuit, ipse fumere potuit.

Interea nulla perspiratio observabatur, sed urina crassa continuo mansit.

Quare, ut simul evacuatio per peripheriam corporis fieret, jussi balneum, quod domi parari debuit, & simul eadem dosi mixturam fumeret, quibus intra octiduum tantum lucrabatur, ut auxilio alicujus famuli in cubiculo aliquoties obambulare puerit.

Curam vero acceleraturus, me invito, & aliorum consilio summa hyeme, & maximo frigore balneum baadense adivit.

Brevi vero neglecti mei consilii poenituit, cum in ipso balneo idem frigus,

eosque atrocissimos dolores cum immobilitate totius corporis perferit.

Vocatus consului, ut domum repeteret, & denuo pulverem de extracto aconiti & saccharo continuaret.

Secutus meum consilium integre curatus est.

Falconarius rheumatismis diuturnioribus denique arthritide vaga laborans plura medicamenta interna, & externa frustra sumfit; postquam vero per mensem pulvere ex saccharo, & aconiti extracto usus fuit, suis doloribus arthriticis integre liberabatur.

Post quatuor dies ab assumpto hoc remedio calidum madorem perentiebat cum levitate omnium membrorum.

Mane & vesperi sumfit quindecim grana.

In

In tribus monasteriis plures Reverendi patres arthritide vaga & fixa laborarunt, nec ab ullo medicamento citius, & constantius levamen habuerunt, ac post usum hujus pulveris.

Ex illis vir, octuagenarius, qui plures provincias visitando hunc morbum contraxit, pro animi sui candore mihi sæpius affirmat, se a multis annis non ita agilem ac post assumptum hoc remedium fuisse.

Plures casus de virtute hyosciami referre possem: unum duntaxat, quem a paucis diebus magna animi lætitia observavi, narrare sufficiet.

Nobilis, sed pauperrima vidua Fesendorffii, tempore humidissimo pedes iter in urbem fecerat.



Ex hac redux in ipsa via sanguinem sæpius vomuit.

Domum veniens illo die convulsiones toto corpore, quæ vix per horas remiserunt, habuit una cum atrocissimo dolore per omnia membra.

Chirurgus facta venæ sectione, & datis medicamentis sine effectu, me rogat, vellem ipsam visitare.

Vigesima secunda Decembris illam vidi, in miserrimo hoc statu, Præscripsi:

℞. Extract. Hyosciami gr. x.

f. pil. gr. j.

S. ut manè & vespere unam fumeret, superbibendo infusum leviter aromaticum.

26. Decemb. denuo illam vidi, & magno solatio mihi narravit, quod post primam pilulam aliquos tantum insultus convulsionum, altero autem die præter debilitatem,

tem , & sensum frigoris in artubus per vices repetentem nihil advertisset.

Et ab illo die se placide dormivisse, & alvum bis de die , quæ prius rara fuerat , habuisse, & nunc se appetere, & in omnibus se bene habere.

Magnificus ac doctissimus serenissimi Archiducis LEOPOLDI Archiater Dominus *Krapf*, qui Tergestini per plures annos praxim medicam feliciter & magna cum laude exercuit circa cicutam hæc observata præcipua habet.

Observavi primo: quod efficacior virtus sit in illa, quæ in locis umbrosis agri Tergestini crescit, quam quæ in aëre aperto habitat, & tota die solis præsertim meridiani radiis exposita est; & hæc est ratio quare cicuta justinopoli maxima copia crescens extra mœnia urbis in loco

aperto sole diurno perpetuo irradiata vix unquam perceptibilem mihi præstiterit effectum ; dum ex adverbo cicuta Lipizæ, præstantissimo imperiali equitio & ubique in carstio in locis terra uliginosa refertis, humidiusculis & æterna fere umbra obscuris collecta longe acutiori viroso odore pollet, & sæpe cito desperatissimos morbos tollit.

Quam causam cum in principio, quo cicuta uti coëpi, ignorarem, mirabar sæpe, cur in morbo, qui cicuta, in locis umbrosis collecta, tractatus cito notabiliter minuebatur, adhibita postea ex hujus defectu illa, quam Justinopoli Pharmacopœi me suadente colligebant, quia facilius minorique pretio haberi posset, cura quam lentissime procederet, imo non raro denuo morbus increfceret.

Se-



Secundo: observavi quoque, quo calidior aër est, eo efficacia cicutæ minor, hinc cicuta in carniola ob altitudinem soli notabilissimam & hinc frigidius cœlum melior illa, quæ in vallibus tergestinis crescit, forte & alia ratio subest minus mihi cognita, & a differentia climatis pendens: exemplum habeo a radice seu bulbo colchici, qui in multis regionibus venenatus deprehenditur, in Carniolia tamen, & agro tergestino hominibus innocua planta, ita ut bulbos integros recentissimos autumnò, dum floret, comederim, neque præter ingratum amarorem ullam in functionibus sive vitalibus sive animalibus sive denique naturalibus alterationem detegere potuerim, quamvis ad omnia attentissimus.

Tertio: penetrantiores sunt vires, & promptior effectus in recenti succo per

lintheum expresso ; jusculo vel & potui theato admisto & illico hausto , quam in extracto præsertim negligenti encheiresi præparato. Nam ratio hujus diversitatis pendere videtur a majori copia diffusi spiritus illius virosi per inspissationem ope ignis in formam extracti, quam si ex contusa herba expressus succus ab igne non mutatus illico hauriatur, docet id minus virosus odor in extracto quam in infuso vel expresso succo, ad quem minuendum, cum multis valde ingratus fit, addere solebam, vel elæosacchar: citri vel syrupum cortic. citri si forma thee sumeret, quibus vero cum Jusculo præplacebat, tunc parum pulveris cinnamoni, macis & aliquid salis miscebam, & sic utcumque gratum aliter nauseosum reddebam remedium.

Quarto: extractum recens & parva paratum copia efficacius veteri & in magna copia parati, idem & observavi in extracto quod verno tempore paratur, quod semper penetrantius illo, quod ex planta jam adulta & æstivis fit mensibus. Hinc effectus hyeme tardiores vidi quam verno tempore, & dum nonnunquam frustra ægrum ad nauseam implevi cicutæ extracto hyeme, paucis veris diebus effeci plus, quam antea per menses.

Quinto: minoribus viribus pollens observavi etiam extractum, quod ex herba una cum caulibus adultioribus & jam fere exsuccis fieri solet a pharmacopœis, qui promiscue omnia contundunt vel ideo tantum, ut majori copia acquirant extractum, quam ubi a ramis minoribus nonnisi vel tenella adhuc paratur herba.

Sex-



Sexto: præterea inutile est extractum & fere effoetum, quod parant negligentes pharmacopœi ex cicuta in cumulos congesta & tribus, quatuor, pluribusve diebus in loco humido, ne exsicceetur, relicta, ubi fere jam putrescere incipit, & flavo colore infici herba, quod corruptionis signum.

Septimo: nullum unquam finistrum ex usu cicutæ habui effectum, quamvis in ea adhibenda potius excessu quam defectu doses usus fuerim. Sic sæpe pertinaciter insistendo usui, & augendo cum prudentia dosim curavi mala, quæ ipsemet jam ut desperata relinquere statueram. Pro una dosi succi recentis sæpe tres manipulos herbæ contundi jubebam, & ter, quandoque quater in pertinacissimis morbis adhibebam semper tamen attentus, quæ mutatio fieret in corpore.

Octa-

Octavo: decocto cicutæ in vase clauso & per canulam plus minus longam vapore ejus excepto & loco affecto immediate applicato pulcherrimos vidi effectus in scirrhis mammarum tumoribus, glandulis subaxillaribus induratissimis, scirrhusa uteri præsertim orificii ejus duritie jam carcinomatosa.

De interno usu quasdam historias addo.

Domina N. multarum prolium mater ante duos annos laboravit in parte laterali regionis hypogastricæ tumore profunde sito ad pugni magnitudinem, tactu satis facile perceptibilem, cum gracilis esset ægra, & flaccidum haberet ventrem, tumor hic jam a quatuor mensibus crevit, tactu mobilis fuit, & nunc jam dolere ita incipit, ut ægra vix corporis truncum

cum

cum flectere sine molestia valeat, libera tamen est alvi & urinæ excretio, mensesque bene fluunt. Ufa est per duos menses extracti recentis notabili quotidie dosi, sensim aucta, & interpolatis vicibus succo cum jusculo carniū & sic integre evanuit tumor. Externe solum emplastrum de cicuta applicatum fuit, non ut exinde effectum sperarem, sed ut ægræ satis facerem, id roganti.

Bibliopolæ uxor die 23 Septembris 1762 absque omni manifesta prægressa causa afficitur vomitu cruento ea vehementia, ut a copia nimia sanguinis frustulatim rejecti, quo tota matula urinaria implebatur, in syncopen incideret, atque ab omnibus mortua crederetur, cum revera mortuum pallori faciei, frigore totius corporis &c. referret. Rediit tamen  
suc.



ſucceſſive ad ſe applicatis a me, quæ congrue judicaveram, rediit aliquoties hic vomitus minori tamen ſanguinis rejecta copia, ſed ſemper grumofi, ceſſavit poſtea vomitus, ſed eum excepit dolor hypochondrii finiſtri tam vehemens, ut inſpirare non auderet, & ſe pleuritide laborare conſtanter aſſereret, pulſus tamen erat valde tardus & ita debilis, ut parumper fortius appreſſis digitis non perciperetur.

Menſis ſpatio perſeverabat dolor abſque omni remiſſione, imo potius ſe magis dilatabat, variis quamvis remediis incaſſum adhibitis, cicutæ extractum, cum ſuccum ægra reſpueret, forma pilularum exhibui, a cujus uſu jam poſt 14 dies levamen ſenſit, & inter 5 ſeptimanas feliciter eſt curata.

Græ-

Græci cujusdam mercatoris uxor post partum felicem satis, quarto puerpueri; die percipit tumorem durum subito exortum & dolentem subcutaneum in regione inguinali sinistra, nescio quibus rebus a quodam anu græca applicatis disparet tumor, & ejus loco incipit tumere crus a taleolis ad genu usque cum dolore & rubore, applicantur varia ad hunc tumorem dissipandum & a chirurgis & medicis, sed malum omnia exasperant, tumor qui ante prementi cessit digito, jam durus evadit ita, ut nullam susciperet pressionis foveam, sed ligni instar resisteret, fert malum per quatuor menses satis tranquille, sed cum postea motus impedimentum in dies increfceret, me consulit, præscribo vaporem cicutæ recentis ope canulæ applicandum ter quotidie per  $\frac{1}{4}$  horæ  
tali

tali fucceffu, ut inter 18 dies fanus effet pes, neque amplius tumor rediit.

Nobilem tergeftinum, peffima phthi-  
fi penitus extenuatum, & de cujus falute  
jam omnes medici & amici desperabant,  
cum nec diæta lactea, nec remedia con-  
tra phthifin decantata, nec ipfe cortex  
peruvianus, audaci dofi exhibitus, leva-  
men adferebant, cicuta fanavi.

*Illuftris matrona*, tumore fub axilla  
dextra duro intra tres menses ad ovian-  
ferini magnitudinem increfcente affecta, ob  
varia applicata promifcue incipit fentire  
dolorem lancinantem præfertim in motu  
brachii, & rubere hinc inde obfervatur  
tumor. Vapore cicutæ ter de die appli-  
cato, imperata fimul quiete brachii & ap-  
posito de cicuta emplafiro diffipatus tumor  
fuit totus intra quinque feptimanas.



Fœmina habet mammam cancrofam, durissimam, caput humanum æquans, dolore rodente, urente stipatam, coloris varii, quinque in locis exulceratam, & in sinus & fistulas divisam, tumidis, retorridis, duris, lividis labiis fordido colore imbutis, acrem ichorem stillantibus, vasis sanguineis ad radicem mammæ valde magnis & dilatatis; hanc unanimi consilio chirurgi tergestini amputandam esse concluderunt, verum curata est ope succi cicutæ, & externe applicata recenti contusa cicuta de die bis terve, noctu vero apponebatur extractum de cicuta cum unguento de cerussa. Intra tres menses cura perficiebatur adeo feliciter, ut fœmina anno sequenti gravida facta, & felici dein partu peracto lactare hac mamma prolem suam potuerit, licet mamma variis cicatricibus

de-

deformis, minorque altera sana paucius lac funderet, hancque curam totam debet generosæ dominæ Tribuzzi, quæ erga pauperes hujus urbis plurima opera charitatis exercet, & quæ compassione singulari mota erga hanc fœminam, mihi illius curam commendavit, & generose laborem remunerata est.

Fœmina jam a multis annis fluore albo, acri, & pudendorum labia erodente laboravit. Os uteri a minimo adtactu vehementer doluit, & observabatur tumor magnus, durus, qui totum spatium inter ossa pubis, & uteri collum replevit.

Excepto per genitalia vapore cicutæ, ope canulæ in vaginam immissæ ter de die per  $\frac{1}{4}$  horæ, & cicutæ succo ve extracto per quatuor menses assumpto hæc

foemina integre curata ab hoc malo est, & disparuit tumor.

Infans 7 mensium ulcere carcinoma-  
toso, sordidis & callofis, livescentibus, tu-  
midis labiis cum effluxu humoris tenuis,  
viridescentis, pauci tamen, in regione late-  
rali dextra spinæ dorsi, quæ est intra ul-  
timam vertebam dorsi & primas lumbo-  
rum, afficitur jam a primis suæ nativita-  
tis diebus; carcinoma hoc latitudine trium  
pollicum est & fere totidem longum, de-  
pascens continuo serpendo etsi lente par-  
tes vicinas tunicamque cellulosam, mu-  
sculos ibidem sitos tegentem, ut fibræ ten-  
dinosæque infectiones videantur nudæ,  
dolorque acutissimus attactu videtur esse  
ex summo, quem infans edit, clamore,  
emaciatus jam ita, ut sceleton potius re-  
ferat squallida tectum cute.



Natum fuisse infantem ait mater cum tumore quasi spongioso, angusto, elevato, & rubro valde colore, ut figura sua & colore cristam galli referret, clamaretque infans, si rudius tangeretur; postea observabatur, livescere summitatem & ichorem rubescentis coloris exstillare, & sensim fieri ulcus malignum. Multa a chirurgis, multa a me tentata frustra fuerunt, sola aqua calcis videbatur humoris effluentis qualitatem mutasse, ut potius purulentus, tener, albicans, quam ichorosus esset; cicutæ extracto per 14 dies applicato cum aqua calcis, pauca quantitate mista, ulcus ita parvum factum est, ut vix pollicem æquaret, & sic intra 5 circiter septimanas infans integre sanatus fuit.

Egregius *Kollman*, physicus in nosocomio hyspanico militari:

Puer, octo annorum, semper sanus, nisi, quod ab aliquo tempore ventrem tumidulum gessisset, decima Decembris 1764 dolore lateris punctorio cum tussi sicca nauseaque correptus est; ad dolorem mitigandum, fila ex lino ducta oleo calido intincta, applicata sunt, quo facto dolor intra bidui spatium cessavit; ob nauseas, vomituritionesque balneator vomitorium dedit, nihil autem inde melius habuit, sed accedente epigastrii dolore nausea perrexit ita, ut assumpta juscula sæpius evomeret, permanente simul tussicula sicca, atque deinde ita debilitatus est, ut vix pedibus insistere potuerit.

Tandem mater 25 Decembris puerum ad me portavit.

Quem cum examinarem, inveni pulsum debilem, celerem, respirationem diffi-

difficilem, anhelosam, ventrem tumidum, totum epigastrium aëre instar durum; pedes ad genua usque œdematosi, vel maxime circa malleolos digitorum impressa vestigia servabant; scrotum tumore lymphatico distentum erat.

Infaustam matri prognosim dedi; interne tamen aliquid tentandum esse putavi.

Obstructiones in visceribus abdominalibus adesse venter tumidus, epigastrium durissimum, non cedens pressioni, nausea, & vomitus manifeste declarabant; fluctuationis præterea gravis, quasi gelatinosa materia in cavitate abdominis contineretur, perceptio percussio una manu abdomine, altera ad latus oppositum applicata, ascitis non obscura dedit signa: neque levis suspicio collectæ in cavo tho-



racis lymphæ oriebatur ; tussicula enim sicca, cum decubitu fere impossibili eam innuere videbantur.

Obstructiones solvendæ, lymphæ in cavitatibus, & membrana cellulosa collecta evacuanda erat. Præscripsi ergo :

℞. Extract. cicut. gr. xx

Terræ foliat. tart. dr. i β

aq. fœnicul. unc. iv

oxymellis colchici unc. i

M.

S. ut omni bihorio fumeret cochleare.

Emplastrum diabotan : epigastrio applicari curavi.

Post biduum rediit mater nihil in melius mutatum puerum, scrotique tumorem auctum esse ajens.

Præscripsi eandem mixturam addendo adhuc unc. oxymellis colchici. Ad scrotum

tum aquam calcis, cum spiritu vini camphorato applicui.

Vigesima nona mater ajebat tumorem epigastrii molliorem, vomitiones cessasse, urinam majori copia excerni, alvum liberioresse, ægrum jura carniū assumere, per intervalla dormire, scroti tumorem imminui, tussiculam siccam adesse, sed non adeo frequentem.

Post biduum omnia in melius mutata esse dixit mater, eadem igitur medicamenta continuata sunt. Sic de die in diem melius habuit æger.

Dein læta me accessit mater, dicens: puerum suum admodum bene se habere, cibos leviores cum appetitu assumere, tussim vix ullam adesse, scroti & pedum

tumorem evanuisse penitus, somnum esse bonum.

Decima Januarii rogavit me, ut mixturam adhuc semel præscribam, ut si forte adhuc aliquid lateret in corpore, per urinam evacuetur, promisit se cum puero, qui exire jam posset post biduum ad me venturam, quod & fecit, meque de integra complicati morbi curatione convicit, alacer puer fuit, & integre sanus.

Miles hydropicus in nosocomium allatus variis ante meum adventum a duodecima Septembris ad vigesimum secundum Octobris medicamentis & purgantibus & diureticis usus est, idque non absque levamine, renascente tamen semper hydrope, & anasarca, & ascite.

Di-



Dicebat æger hydropem subito natum fuisse, neque febrem intermittentem, neque acutam, neque alium quemcunque præcessisse morbum: potibus spirituosus autem se deditum fuisse fassus est.

Dum ego ægri curam suscepi, pedes & femora, totusque venter immaniter tumuit, scrotum adulti hominis caput magnitudine æquavit, penis quoque inflatus varieque intortus fuit, in abdomine præter manifestam fluctuationem hinc inde durities deprehendebatur.

Dedi oxymel colchicum, & quia viscera abdominalia simul infarcta erant, sequentem præscripsi mixturam:

℞. aquæ. Fœnicul. unc. vi.

terræ foliat. tart. dr. j.

oxymell. colch. unc. ij.

M.

S.

S. omni bihorio fumat cochlearia duo, scroto tumido sal decrepitatum applicatum est.

Cum autem post aliquot dierum spatium nihil fere levaretur æger, quamvis urinæ copia assumtum potum multum superaret, alvusque libera esset, sed respirationis difficultati tussis sicca jungeretur, suasi, ut paracentesis institueretur, præcipue quia in illo loco, ubi punctio fieri solet, nulla durities percipiebatur, sperans fore, ut, quod sæpius vidi, & hydrops anasarca vasis abdominalibus a pressione liberatis imminuatur, vel saltem insigne symptomatum levamen contingat.

Jamque postero die omnia ad operationem necessaria parata erant, ast! examinato prius ægro, tumorem, post  
in-

ingentem per integram noctem missam  
urinæ copiam, alvumque aliquoties de-  
jectam, multum imminutum, respiratio-  
nemque liberiores redditam, deprehen-  
dimus; hinc ab operatione abstinendum,  
eademque medicamenta continuanda esse,  
conclusimus.

Atque hoc modo intra mensis spa-  
tium non tantum ascitis curatus, sed to-  
tum abdomen molle redditum est, scro-  
tisque & penis tumor evanuit, pedum  
tumor diutius persistebat, qui tamen iis-  
dem medicamentis post tres circiter  
septimanas cessit. Metu recidivæ retinui  
ægrum, ad vigesimam januarii usque,  
quo die ad legionem suam adeundi cu-  
pidus nosocomio valedixit sanus.

Hydrops anasarca in tribus aliis æ-  
gris a diuturna febre intermittente natus

solo



solo oxymelle colchico intra breve temporis spatium curatus est.

Prima Decembris anni 1764 in nosocomium allatus est miles, 30 circiter annorum, cui a gonorrhœa, intempestive curata, tumor ortus est in perinæo durus, immobilis, sensim crescens, dolensque, qui, dum in nosocomium venit, ovum gallinaceum magnitudine superavit.

Dolores non tantum in tumore, sed & in testiculis, artubusque conquestus est æger, noctu auctos; testiculi naturalem servabant magnitudinem, urinam absque impedimento mittere potuit.

Cicutæ efficaciam in fundendis tumoribus scirrhosis in cancrum abeuntibus toties expertus non dubitavi eandem & in hoc casu in usum vocare.

Hinc

Hinc præmisso purgante præscripsi:

℞. Extract. cicut. dr. ij

f. pil. gr. iv

conspergantur pulvere liquiritiæ, sumat  
æger mane & vesperi pil. iij.

Tumori facculos ex herba cicutæ  
aquæ & lacti intinctos applicari jussi de  
die, noctu emplastrum de cicuta appli-  
catum est.

Hoc medicamento effeci, ut tumor  
intra octiduum minueretur, dolorque  
multum remitteret, ita, ut æger, jam  
de artuum doloribus magis conquerere-  
tur, quam de dolore tumoris in perinæo.

Cum jam extracto aconiti in curan-  
dis doloribus rheumaticis, arthriticisque,  
etiamfi a lue venerea ortum illi duxe-  
rint, omnibus reliquis etiam decantatis-  
simis remediis incassum adhibitis, ali-  
quo-

quoties cum successu usus fuisssem, præscripsi:

℞. Extract. cicut. dr. j.

— aconiti gr. iij.

m. f. pil. gr. iv.

S. ut mane & vespere sumat tres.

Quo facto non solum tumor absque suppuratione sequente sensim fusus est, sed & dolores artuum remiserunt.

Atque hoc solo medicamento intra quinque septimanarum spatium, & a tumore & a doloribus arthriticis, curatus est æger.

Quinta enim januarii sanissimus e nosocomio exivit.

Dolores rheumaticos absque febre in quacunque corporis parte fixos extracto aconiti facile brevique tempore curavi.

Men-



Mense novembri sex milites successive in nosocomium venerunt, quorum quidam intra sex, quidam intra decem ad summum dies omni dolore liberati sunt; quamvis bini horum partis, quam dolor occupavit, motu præ dolorum acerbitate caruerint.

Dabatur illis præmissio, si opus fuit, purgante mane & vesperi similis pulvis:

℞. Extract. aconiti gr. i

sacchari albi dr. β

m. f. pulv. tenuissimus.

Ut autem de aconiti effectu certior essem, neque decoctum, neque infusum ipsis præscriptum fuit: poterant ad libitum vel aquam fontanam, vel decoctum hordei cum liquiritia (qui potus nostris militibus communis est) bibere.

R

Do-

Dolores arthritici, si non nimis inveterati fuerunt, eidem medicamento facile cesserunt; in inveterato autem malo diu continuandum fuit.

Arthritides venereæ, quæ mercurio sublimato, in spiritu frumenti soluto, curari non poterant, solo hoc pulvere, ex aconiti extracto & saccharo quandoque brevi curabantur, quandoque autem addito, præscripto pulveri, grano uno mercurii dulcis, res melius successit.

Illis, qui nec mercurio sublimato, neque cicuta, quæ certe & in arthritide multum valet, neque extracto aconiti vel solo, vel mercurio dulci juncto sanari poterant, dabantur pilulæ sequentes.

℞. Extract. cicut. dr. j.

extract. aconit. gr. iij.

m.

m. exacte & f. pil. gr. iv, conspergantur pulvere liquiritiæ.

S. mane & vesperi fumat tres.

Quid his pilulis effectum fit, sequentes bini casus, maxime memorabiles, exemplo erunt.

Miles vigesima prima Julii 1764 in nosocomium allatus est, stranguria laborans; præterea autem doloribus arthriticis noctu auctis torquebatur.

Ex propria confessione, & confideratis omnibus symptomatibus inventus est venereus.

Stranguria brevi temporis spatio curabatur, sed dolores arthritici nulli medicamento cesserunt.

Dum ego ægri curam suscepi, præmisso purgante exhibui pulverem aconi-

R 2 ti,



ti, ut supra dictum est, nullum ab his aliquamdiu assumtis levamen sequebatur.

Hinc ad mercurium sublimatum cum spiritu frumenti confugiebam, atque decoctum bardanæ simul potandum dedi, sæviebat nihilominus magis arthritis, & pectore æger etiam laborare cœpit, hinc denuo ad priores pulveres deventum est, qui etiamnum nihil effecere.

Interpositis tamen purgantibus, & aliis medicamentis usus iterum horum pulverum imperabatur ad decimam quintam usque diem decembris, qua pilulas cicutæ cum kermes mineral. & mercurio dulci, quibus quandoque cum successu usus sum, ad similes morbos curandos, præscripsi, sed salivatio vix aliquot assumtis pilulis orta harum continuationem prohibuit, bis enim jam, quod

quod tunc primo fatebatur, salivationem passus est æger.

Exhibito autem purgante, datoque decocto emolliente mox cohibita est salivatio.

Ea propter iterum pulverem aconiti, cui simul pulvis ligni sassafras junctus est, præscripti, sed parvum & vix notabile inde habuit levamen; tamen medicamento hoc diu continuabatur.

Dein sola cicuta in usum vocata est, & cum pectoris dolores simul conquereretur, infusum stipitum dulcamaræ simul præscriptum fuit.

Ast re melius examinata in sterno, & costis varias exostoses deprehendimus, quarum una etiam in angulo maxillæ inferioris, in latere scilicet dextro, tangi

poterat , cumque dolores osteocopi per vices redirent majores , præscripsi :

℞. Extract. cicut. dr. j.

extract. aconit. gr. iij

m. f. pil. gr. iv. conspergantur pulvere liquiritiæ

S. mane & vesperi sumat iij.

Quibus effectum est , ut non tantum exostoses solverentur , sed & dolores integre cessarent ita , ut æger tandem trigesima prima Januarii 1765 validerit nosocomio.

Miles in principio mensis May 1764 in nosocomium allatus est , arthritide venerea laborans , variis aptissimisque ad hunc morbum curandum medicamentis tractatus nihil levaminis percepit.

Tandem mense Julio in thermas Baa-  
denses missus est , ast ! magis ibi sævie-  
bant



bant dolores, ita ut balneo abstinere occasionemque exspectare debuerit, qua commode in nosocomium reportari potuerit, quod & septima septembris factum est.

Hic denuo mercurialibus & decoctis variis usus est, sed incassum.

Tandem ego ægri curam vigesima tertia octobris suscipiens, pulveres aconiti simplices tentavi, sed vix notabile inde levamen percepit, noctu quippe doloribus immaniter sævientibus, ita, ut totus emaciaretur.

Addidi dein pulveri aconiti mane & vesperi gr. i mercurii dulcis, & decoctum althææ cum lacte potandum dedi.

Sed neque inde magna in melius mutatio facta est.

R 4

Hinc

Hinc æger ipse petiit mercurium sublimatum, quem & lubens concessi; modo magnam decocti cum lacte copiam simul biberet; ast nec inde levabantur dolores.

Tandem ad pilulas cicutæ cum aconito supra descriptas deveni, inde mox dolores minuebantur, semperque æger noctu somnum capere potuit, adeoque refocillatus est, ut lecto surgere, & in cubiculo obambulare potuerit.

Et intra tres septimanas ab assumtis pilulis omni dolore caruit.

Retinui ægrum aliquamdiu in nosocomio, sed cum optime valere pergeret, legionem suam revivendi cupidum quinta Februarii dimisi sanum.

Uxor cujusdam chirurgi præterquam quod menstrua inordinata, id est omni

al-

altera septimana citius seriusve habuerit, eaque adeo copiosa, ut quandoque sanguine defluerit, passionibus hysteriis admodum obnoxia fuit, varia ad moderandum menstruum fluxum applicata fuerunt medicamenta; decantatissimis anti-hysteriis roborantibusque medicamentis passionibus hysteriis obviam ibatur: his autem omnibus levamen quidem malorum in paroxysmis, curatio vero integra obtineri non poterat.

Quo factum est, ut aliquamdiu omnia respueret medicamenta.

Sed passiones hystericae adeo invaluerunt, ut non tantum ad levem terrorem iramve, sed & absque notabili praegressa causa convelleretur quandoque saepius per diem.



Accessit his malis dolor lateris gravativus, per intervalla urens, & respiratio difficilis; tandem accepto de morte matris nuncio repetitis vicibus una die diriffimas passa est convulsiones, atque ab illo tempore inter confabulationes amicorum subito sæpe convulsa est.

Cum jam iterato meum consilium imploraret, præscripsi:

℞. Extract. cicut. dr. ij.

extract. hyosciami gr. xx.

m. f. pil. gr. ij. conspergantur pulvere liquiritiæ.

S. ut ter de die sumat quinque.

His pilulis aliquamdiu assumptis non solum convulsiones non redierunt amplius, sed & dolor lateris cessabat, & respiratio naturalis reddebatur; & menstrua tempore & copia debitis sequebantur; & ut

ver-

verbo dicam, adeo mutata est foemina, ut quamvis in iram maxime proclivis, facileque terrenda prius, nihil jam mali ab oppositis illis animi affectibus patiatur, & in hunc usque diem sana vivit.

Expertissimus *Brambilla* serenissimi Archiducis LEOPOLDI chirurgus.

Juvenem, 14 annorum, qui jam a tribus annis difficili auditu laboravit, & nunc per plures menses perfecte surdus fuit, curavi pilulis, quæ ex una parte extracti corticis peruviani, & ex binis partibus extracti cicutæ erant paratæ, ex consilio nostri Protomedici Domini *Graf-fenhuber*.

Tres milites gregarios magnis strumis affectos solo cicutæ extracto, & externo ex eadem herba fomento, integre liberavi,

beravi, & aptos iterum ad sua servitia restitui.

In binis dissipabantur strumæ benigna resolutione, in tertio autem suppurando consumpta fuit struma.

Dominus *Gottschener*, medicus aulicus.

Extractum aconiti optimo cum effectu adhibui in amaurosi, ita quidem, ut æger visum iterum recuperaverit.

Josephus *Müller*, chirurgus atzgerstorffensis, sequentia notat.

Vir, 63 annorum, in crure dextro magnum & foedissimum fistulosum ulcus habuit, quod omnes carnes ad ossa usque corrofit.

Postquam plurima adhibuisssem remedia sine effectu, applicui cataplasma ex cicuta, & saturato infuso cicutæ feci injectiones in sinus; mox secesserunt car-

nes



nes corruptæ, putridæ, & novæ recreverunt, sinus omnes perfecte clausi sunt, & intra trimestre spatium hic æger fuit optime curatus, & est jam in secundum annum sanissimus.

Fœmina a pluribus annis in pede dextra habuit ulcus dolentissimum, & ad omnia remedia pertinax.

Exhibui illi interne extractum cicutæ, & pedem affectum bis quotidie per horam in cicutæ balneo detinui, & deinde texi emplastro de cicuta.

Hac ratione inter binos menses sanata est, & jam in quintum annum bene valet.

Vir hortulanus binos tumores duros, magnos & immobiles habuit ad genu sinistrum jam per tres annos, hos solo cicutæ emplastro dissipavi.

Aurigam curavi solo interno & externo cicutæ usu, qui a quatuor annis tumorem scirrhosum, & ovo anserino majorem in collo gessit.

Puer a binis mensibus habuit ventrem prætumidum, & asseris instar durum, longo tempore ipsi dedi salia media, & purgantia sine effectû.

Dein exhibui cicutæ extractum, & desuper ut biberet cicutæ infusum, jussi. Spatio quatuor septimanarum emolliebatur venter, dedi dein bis purgans ex granis xxx Jalapæ, quo multi vermes rotundi & longi prodierunt, & miser penitus convaluit, qui jam contabescere cœpit.

Rusticus in latere sinistro thoracis ulcus magnum, sordidum, saniosum habuit, quod neglectum ipsas costas carie affecit.

Hunc

Hunc solo cicutæ usu externo intra sex septimanas sanavi.

Fœminæ oritur subito vesica magna, lata, gangrænosa in metacarpo manus dextræ, materies intus contenta intra paucum tempus vicinas partes ad ossa usque corrofit.

Advocatus aperui vesicam, & effluxit foetidissima sanies, ulcus dein solo cicutæ infuso deligavi & fovi, malo mox limites ponebantur, & recreverunt novæ carnes, & optima cicatrix formata fuit.

Lanionem, qui fœdum, saniosum, & serpens ulcus in labio oris inferiore habuit, quoque cicuta curavi.

Infans foetidum ulcus habuit in capitis parte postica, quod ad cranium usque



usque penetravit, & creverunt in eo innumeri vermes admodum parvi.

Insperfi pulverem de cicuta, & lavis quotidie infuso cicutæ, mox enecabantur infecta, & ulcus clausum est.

Alium infantem eodem malo laborantem eadem methodo curavi.

Juvenis, 12 annorum latam maculam albam in oculo sinistro habuit, imposui in hunc oculum omni mane paucam extracti cicutæ quantitatem, & jussi, ut oculum clausum teneret, quamdiu esset possibile; circa meridiem eundem oculum elui aqua stillitia cicutæ, hoc solo remedio macula disparuit, & juvenis bene videt.

Rusticus tota hyeme magno dolore vexabatur in brachio sinistro, quamvis multa adhiberentur remedia, auctus tamen

men est dolor, & brachium factum est rigidum.

Hunc balneo cicutæ, cum aqua & lacte parato, curavi.

Infans juscule ebullienti exurit ita, ut cutis ex scapula, humero, & brachio dextro pluribus in locis secefferit.

Mater per 14 dies varia adhibet remedia, sed infans semper pejus habet, febricitat, delirat.

Tandem ego advocatus, inveni ingentes crustas exsiccatas, sub quibus acris materies usque ad ossa penetravit, hinc inde caro fungosa excrevit.

Statim venam secui, & injeci enemata, dedique mixturam refrigerantem, quæ alvum leniter moveret, externe

S

præ-

præter cicutaë infusum, lacte paratum  
nil adhibui.

His infans perfecte curatus est.

Parisiis mihi sequens morbi historia  
scribitur :

Nobilissima Matrona (55 annorum)  
a sex abhinc annis fluxu menstruo pri-  
vabatur; & ab eo tempore advertit tu-  
morem œdematosum & dolorem obtu-  
sum in pede sinistro. Sub initium anni  
1764 excrevit inter os quartum & quin-  
tum metatarsi ejusdem pedis tumor, ma-  
gnitudine nucem adæquans, durus, pro-  
fundus, dolens, ruber, calens, & pul-  
sans, qui abiit in suppurationem & spon-  
te ruptus multum puris fundebat.

Post tres septimanas apertura hujus  
tumoris forfice dilatabatur, caro erat  
fun-



fungosa, & ossa metatarsi inveniebantur cariosa, tumor œdematosus se se extendit tres pollices supra malleolum, laterales plantæ pedis partes erant quoque semper tumidæ, oriebantur sinus, & inde fiebat ulcus foedum.

Hoc in statu exhibebantur Nobilissimæ huic ægræ aquæ minerales per binos menses, & applicabatur ex iisdem bis quotidie embroche, &, ut curatio fieret citius, adhibebantur fortissima remedia externa, quæ cariosum separarent. Ægra inde multum dolorem sensit, & ulcus reddebatur pejus.

Tandem consilio medicorum & chirurgorum eximebantur os cuboideum, & os tertium, quartum, & quintum metatarsi. Post dolentissimam hanc opera-

tionem ægra vires amisit, & penitus extenuata est.

Torofitas tamen & vires aliquantulum iterum redierunt ex usu lactis. Manebat autem finus versus parvum digitum, & ad secundum os metatarfi oriebatur novus tumor, qui lanceola pertundebatur, & effluxit sanguis, & pus, & materies albumini ovi similis, remediis corrosivis & causticis denudabantur ossa, quæ omnia inventa sunt cariosa.

Tentata efficacissima remedia per multos annos vix ullum levamen adferrebant. Tandem ad usum cicutæ devenit, & hæc spatio trium mensium adeo bonos præstitit effectus, ut ulcus totum sit optima cicatrice clausum: nullus amplius adest dolor, disparuit

ruit cachexia, & est totus corporis habitus perfecte idem, qualis erat semper in statu sano, & vires sunt tantæ, ut ægra fulcris suffulta possit ambulare.





THE HISTORY OF THE

REIGN OF THE

EMPEROR

OF THE

CHINESE

EMPEROR

OF THE

CHINESE



